

F. AMBROSII

CATHARINI POLITI SENEN.

ORD: PRAED:

ARCHIEPISCOPI COMPSANI.

OPVSCVLVM

De Cœlibatu,

Aduersus impium Erasmus:

Quod nunc primum in lucem profert,
CLEMENS Politus Nepos.



SENIS,

Apud Lucam Bonettum. M. D. LXXXI.

Cum licentia Superiorum.

COE-COM

E 40 E 40

1418 21

14

1000

MO MO
ILLVSTRIS. AC REVERENDIS.
Alphonso Gesualdo,

S. R. E. Tit. S. Clementis
Cardinali Amplifs.

CLEMENS POLITVS SENEN.
SAL.



IV multumq; dubitavi, Cardinalis Amplifs: (quanquam ne adhuc quidem satis habeo constitutum) quid mihi de libris faciendum esset, quos partim in Sacram Scripturam, partim de varijs questionibus ad eam pertinentibus, Reuerendiss: F. Ambrosius Catharinus Politus Patruus meus, nunquam satis laudat a memoria scriptos reliquit, qui nondum editi, nec numero pauci, nec (quantum doctiss: homines iudicant) pondere leues, apud me asseruantur. Pulsabat animum meum quotidie, ut eos quamprimum in lucem proferrem, chari amor sanguinis, quo quisq; facile commo-

ueri solet, ad maiorum suorum Monumenta, atq; imagines palam proponendas & ostentandas. Qua in re, mea inter omnes propinquos videbantur precipuae partes esse, quem ille peculiari amoris prerogatiua fuerat prosecutus, multisq; ac magnis beneficijs cumularat, atq; in puerili aetate orbatum Patre, filij loco alendum, optinisq; moribus ac disciplinis instituendum curarat; ut ingrati prope animi crimen mihi timendum esset, si praclaros illius labores in tenebris latere sinerem. Huc accedebat quae me valde urgeret atq; impelleret ratio publica utilitatis: nam si caetera illius opera, quae eo viuente sunt edita, vtilissima ac penè salutaria Reip: aduersus eos tantasq; huius miserae aetatis haereseis fuisse, cum grauissimorum virorum testimonia, cum ipsorumque operum toties repetitae editiones demonstrant, iure mihi sperare posse videbar, nihilominorem ex his utilitatem esse prouenturam, quae ab eodem inflammato orthodoxae Religionis zelo, eademq; ingenij praestantia, longioribus etiam vigilijs, ac prouectiore, sapientioreq; aetate perfecta essent. Contra verò ab incepto me deterrebat non modo sumptus, qui in editione esset faciendus, cui ego respondere non valeo, sed etiam temporum infelicitas, quibus omnia sunt obrectatorum & calumniatorum plena. In hac mea diuturna haesitatione, decreui tandem Opusculum de Caelibatu, quod ille ut mihi gratum faceret, aduersus impium Erasmus, una ferè lucubratiuncula olim exaruit, in medium proferre, ut ex hoc saltem discam non magno periculo, quid de caetero consilij capiam. Hunc verò tibi (P. Sapientiss.) Caelibs Caelibi de Caelibatu librum dicavi,

qui & rei meae familiaris angustias tua munificentia as-
idue subleuas, & auctoritate adeo polles, ut facile tibi fu-
turum sit obrectatorum ora comprimere. Postremo si tu-
rum locorum, tuorum etiam hominum fructus iure tibi de-
bentur, cum Patruus meus in locis tuis, Patriq; tui ma-
gni Viri, Compsa Archiepiscopatum tenuerit, ibiq; florue-
rit, nil causa quoq; est, quin tua sint illius omnia. Oro
itaq; te per singularem istam humanitatem, ac benignita-
tem tuam, qua omnes homines ac me potissimum complecti
soles, ut exiguum hoc munus libenter accipias; quod si sen-
sero tibi gratum fuisse, dabo operam, ut maiorum vigilia-
rum lucubrationes, ad Dei Opt. Max. laudem, ad Eccle-
siae utilitatem, ad perpetuam Catharini memoriam, quan-
doque appareant. Vale. Kal. Mai. M.D.LXXXI.



INDEX PRAESENTIS OPUSCVLI.

quàmuis non adeo necessarius, non inutilis tamen.



Braham operam dedit
liberis pluresq; vxores
habuit, tamen ratione
temporis. pag. 44

Aborsus sterilitasq; puniuntur
legibus, scilicet procurata. 71

Adherere Deo bonum est; at
adhesioni huic plurimum of-
ficium coniugium. 75

Ager non cultus, non cadit in
similitudinem coelibatus. 73

Apostoli postquam secuti sunt
Christum, à copula coniugij
abstinuerunt. 55

Bestiæ ideo in venerem profu-
sæ, quia bestiæ sunt. 43

Bestijs, stimuli coitus à natura,
hominibus à peccato 50

Bigamia nō idonea sacerdotio,
per Apostolum. 77

Coelibatus ideo honestior con-
iugio, quoniā Christus & in
seipso & i alijs honestavit. 15

Celibatū, Apostoli & ipsi seque-
bantur, & alijs suadebāt. 54

Coelibatum secuti sunt omnes
viri celebres, sanctiq; tam
Græci quàm Latini ab Apo-
stolorum temporibus. 61

Coelibatus, si propterea quòd
malè seruetur erit tollendus,
etiā baptisma malè seruatiū
erit tollendum, & alia sacra-
menta. 59

Coelibatus, similis Margaritæ
illi præciosæ. 73

Coelibatus à D. Paulo mirabi-

liter commendatus. 23

Coelibatum vituperat Cosmo-
philus, ipse coelebs. 16

Coelibatus, connubium digni-
tate præcellit. 80

Coniugium naturale est, ergo
nihil sanctius: nō tenet con-
sequētia: quia nonnulla tur-
pia dictu sunt naturalia, non
tamen sanctissima 18

Coniugium cum bestijs nos so-
ciat, coelibatus cū Angelis 18

Coitus veneris (vt refert Gel-
li ex Hyppocr.) pars quedā
morbi est comitialis. 71

Cosmophilus verè cum Dijs pu-
gnat, qui cum D. Ioanne Ba-
ptista pugnat. 40

Cosmophilus contra fidem sen-
tit, qui carnis æstus, naturæ
bene insitute non corruptæ
putet. 48

Cosinophilus turpis sentētia, vt
sacerdotes vxores habeant,
non tamen audet dicere bo-
num esse, sed nō pessimū. 61

Crescite illud & multiplicami-
ni, necessariū erat in primor-
dio mundi. — 27

D. Marcus, cetum instituit Ale-
xandriæ coelibum, item alij
Apostoli. 54

Erasmus indignus cuius nomen
sciatur. 11

Eua in Paradiso creata, non au-
tem Adam 30

Falso imponitur legi Mosaicæ

quòd excretur steriles. 34
 Gigantes bellasse cū Dijs, idest
 cum natura ipsā, malè inter-
 prætatum. 39
 Gigantum illam cum Dijs pu-
 gnam, Macrobius optime
 interpretatur. 39
 Hieronymus, summus Virgini-
 tatis laudator. 69
 Immortalitatem per coniugiū
 dari, malè somniatum. 83
 Matrimonium institutum qui-
 dem à Deo, verū, & omnia
 alia sacramenta. 29
 Matrimonium ideo primum sa-
 cramentū institutum à Deo,
 quia alia tum non erant ne-
 cessaria. 29
 Matrimonium in Paradiso in-
 stitutum: non idcirco dignif-
 simum omnium sacramen-
 torum. 30
 Matrimonium, datum nunc
 etiam ad remedium. 31
 Membra nō ideo frustra data,
 quòd ijs non vtimur. 46
 Miracula Christi imitari non
 possumus, at virtutes possu-
 mus imitari. 81
 Mors à peccato & propter pec-
 catum in homine, nō autem
 in bestijs. 51
 Mundus non potest deficere
 ob cēlibatum, exemplo præ-
 teritorum temporum, & au-
 thoritate Domini dicentis,
 Non omnes capiunt verbum

7
 istud 38. & 73
 Natura sumus procliuēs ad par-
 tes carnis defendendas. 12
 Occasio huius libelli. 10
 D. Paulus cēlibatum antepo-
 nit coniugio. 21
 D. Paulus aliud, aliud Cosmo-
 philus suadet. 23
 Pereunt (ex Galeo) plures ex
 nimio coitu, quā ex nimia
 retentione seminis. 71
 Poetarū authoritates commen-
 dantes coniugium, non idcir-
 co vituperant cēlibatum. 174
 Prioritas temporis in matri-
 monio, non confert digni-
 tatem. 29
 Pugnare cum natura virtus est,
 contra Cosmophilum 53
 Relinquere patrem & matrem,
 adherereq; vxori, quomodo
 intelligendum. 27
 Salomoni vitio datum, quòd ni-
 miū mulieribus operam de-
 derit. 45
 Senescentem hominem si non
 decet vacare carni, nec etiam
 senescentem mundum. 69
 Socrates ideo vxorē duxit, quia
 natura libidinosus erat. 45
 Stimuli matrimonij ante pecca-
 tum non fuissent, & tamen
 opus matrimonij cum omni
 quiete exercitum fuisset. 50
 Turcis, orationes nostrę potius
 quā innumerę legiones
 obsunt. 60.

FINIS.



9

F. AMBROSII CATHARINI
POLITI SENEN.

Ordin: Præd.

Archiepiscopi Compsani.

DE COELIBATV.



VAM vera sit illa
Domini sententia :

Filij huius sæculi, pru- Luc. 16. b.
dentiores filijs lucis

in sua generatione
sunt , cogimur cum
luctu experiri. Inter
istos autem sæculi fi-
lios , illi sunt maximè

detestandi, qui non sola sui perditione contenti,
in hanc curam toti incumbunt, quò alios secum
in barathrum sempiternæ damnationis præcipi-
tes dedant. Vnus fuit semper nominatus præ-
cipuus Erasmus , qui post nefariam & sacrile-
gam, à votis euangelicis apostasiam; nullum ar-

tificij genus prætermisit, quo omnes posset, maximè teneros animos, à vera pietate auertere: idq; ea aliquando vafritia, vt cum locum lætaliter exulceret, leuiter & quasi ludens, ac se se exercens videatur attingere. Colloquiorum libri, testes nobis sunt nimium manifesti. Quid colloquia cito? Imo verò, quicquid ille euomuit, vel ad obscurandum fidei catholicæ lucē; vel ad corrumpendum christianos mores, inferendumq; atheismum videtur meditatus. Sed ego quidem confido in Domino, qui aliquando providebit, vt quam audissimè & ambitiosissimè sibi comparare studebat gloriam, nedum non assequatur, sed pro gloria ignominiam sempiternam sit reportaturus. Hæc præfatus sum, vt qua occasione subiectam hic lucubrationunculam confecerim, catholicus lector intelligat.

1. Tim. 5. b.

Scribit Apostolus. Qui suorum, maxime domesticorum, curam non habet, fidem negauit & est infideli deterior. Relicti mihi quidam ex defunctis fratribus paruuli nepotes fuerūt, quos omnes (imagines fratrum meorum) salutaribus disciplinis erudiri desiderans, Vnum tamè præcipuè, cui nomen Clemens est, quacunq; mihi ratione ac diligentia instituendum suscepi. Is autem cum apud me omnibus artibus, quibus illa ætas informari solet imbueretur, semel deprehensus est à me, librum præ manibus habere

inscriptū [Erasmus de conscribendis epistolis.]
 qui tum passim ab omnibus legebatur. Aperui,
 in epistolam incidi, quæ primis argumentis mi-
 rificè cœlibatum extollit: At protinus ad eun-
 dem funditus extirpandum, nuptias autem esse
 amplexandas, tanta persuasionum exemplorum,
 similitudinum farragine contendit, vt nec vites
 nec virgulta prætermiserit. Itaq; hominis ad
 iuuentutis perniciem nati calliditatem, hac in
 parte detegendam curauī, ac ipsius iuuentutis
 miseratus, refellere apostatæ malignitatē ope-
 ræ præmium duxi. Quoniam verò indignus vi-
 detur, qui proprio nomine exprimat, sub vo-
 cabulis Cosmophili, idest, amatoris mundi; &
 Aporetici, hoc est, dubitatoris, visum est præ-
 sens argumentum in hunc modum prosequi.



T legi epistolam, à Cosmophilo
 ad te missam, Aporetice, qua te
 ab optione sanctissimi cœlibatus
 abducere, & ad dura matrimonij
 vincula conatur multis argumētis
 pertrahere, eousq; vehementer in tui gratiam
 commotus sum, vt continuò subierit animus ad
 te scribere, vt si forte res tibi est adhuc integra,
 suisq; ille verbis scrupulum duntaxat, uel dubi-
 tationem aliquam animo tuo iniecerit, illam
 procul abs te valeas per ea quæ scripsero facili

amouere. Ac licet metuam tibi ab hominis caliditate, arte, & nonnulla qua præstat eloquij facilitate; illud tamen præ cæteris me conturbat, quòd subdolos ille, non spiritus, sed carnis partes defendendas fouendasq; susceperit, in quas iam nimium natura ipsa, ut latissimè pater, procliuiiores omnes sumus. Verùm aduersus prudentiam tuam diuino fauore munitam, nullo pacto præualebunt illius captiosi rhetorculi præstigia & inanes fuci, nec illa dicendi procacitas, quæ te à multo saniore uitæ perfectioris consilio, quod iam ante cœperas, ad carnis saturandam lasciuiam abducere possint. Ego enim, & si nequaquam illa facultate dicendi fretus, (quippe qui nunquā eiusmodi studijs scrupulosius operam dederim, ac ipse contrà, ferè in omni uita, cum postrema sit iam ætate prouectus, nihil aliud meditatus fuerit) sola tamen luce & fulgore ueritatis instructus id efficiam, ut cognoscas quàm parum prosit omnis ars, atq; omne ingenium, ad obscurandum quæ sunt christianæ religionis, & fidei sanctiora & perfectiora ornamenta. Tuum igitur nunc erit, diuino primùm implorato auxilio, quæ ab illo obiecta, & quæ à me responsa sunt, diligenter colligere, & inuicem conferre; quatenus quid potius in rem tuam promoueat & conducat, certò ualeas iudicare.

Primum igitur quod ille præmittit, memorans illam ab initio affinitatem, qua tecum iungitur, & cū affinitate amicitiam quoq; annexam prope ab incunabulis, quæ vnà cū ætate creuit: & officia quæ abs te in eum collata, mutuam gratiam repossunt, & his necessitudinibus se coactum, quæ ad salutem tuā tuorumq; dignitatem facerent, tuā prudentiam admonendi: quoniam aliena, inquit, nonnunquam rectius, quàm nostra perspicimus: hæc inquam, & quæ huiusmodi sunt, mera arte cōposita, prudenter cogitāti satis indicant, quàm duram illum sumpsisse prouinciam prodant, quàmq; in loco difficili versaretur, postquam hosce fucos, ad persuadendum præmittere opus fuerit. Ego verò quòd meum erga te affectum, hac parte cū illius valeas conferre, non me tibi tanquam affinem vel propinquum, vel ciuilem amicum, cum te nunquam vel de facie cōspexerim, sed vt christianum, non ex proprijs, sed ex charitatis visceribus loquentem, insinuo. Perpende igitur imprimis, quàm tibi suspectus eius sermo esse debeat, cum vt propinquus tibi carne loquatur, anxie quærens quæ sua sunt, & suadens quæ placeant carni: & tibi ab illo caueas, qui hisce prætextibus mouetur, & apertè se moueri fatetur: munias autem te hac parte verbo Domini, qui ait: Inimici hominis domestici eius. Ac contra

Matt. 10. d.
1. Tim. 4. c.

1. Cor. 13. d.

prouide, vt sermo meus, fide & omni acceptio-
ne sit apud te dignus: quoniam de mera charita-
te exprimitur, quæ non agit perperam, nõ quæ-
rit quæ sua sunt, congaudet autem veritati. Di-
cat ergo cum suo Terentio Cosmophilus: Hu-
mani nihil à me alienum puto, & concedimus ei:
modo & permittat me dicere, Christiani nihil à
me alienum puto; sicq; illum audias tanquam
hominem & carne tibi coniunctum: me autem
solummodo vt christianū, qui nullo tecum alio
vinculo astringor, quàm regenerationis Euan-
gelicæ confederatione. Iam igitur attende.

Ante omnia (fingit ille) Antoniū nescio quē
tristem nuncium, in conuiuio certiorē illum
fecisse, matrem tuam defunctam, sororem cho-
ro virginum aggregatam, amicos magno con-
sensu tibi puellam summo genere natam, forma
præstanti, optimè moratam, postremo tui amā-
tissimam summa cum dote obtulisse. Te verò,
nescio qua seu doloris impotentia, seu religio-
ne, ita cœlibatum decreuisse, ut nec generis stu-
dio, nec sobolis amore, nec amicorum vllis aut
monitis, aut præcibus aut lachrymis, à sentētia
abduci possis. Sic ex illius narratione se habet
propositum, ita ut etiam religionis gratia opta-
tam cœlibatus conditionem, velit matrimonio
cedere, hic affinis ac beniuolus tuus. Vnde ait.
Tu tamen vel me authore mentē istam muta-

bis, & cœlibatu relicto sterili, ac parum humanæ vitæ instituto inseruiētī, sanctissimo coniugio indulgebis. Qua in re, neq; tuorū charitatem, quæ tamen alioquin animum tuum vincere debebat: neq; meam autoritatē, quicquā mihi prodesse cupio, nisi clarissimis rationibus ostēdero, id fore tibi lōgè tum honestius, tum vtilius, tum iucundius: quid, quod etiā hoc tempore necessarium?

Haftenus pollicitatio grandis, & ante causæ instructionem prolata sentētia. Vt enim vituperet, vocat cœlibatum sterile, & institutum parū humanū, vera dicens inuitus; diuinum enim institutum est & non humanum cœlibatus: & sterilis quidē carni, sed fructuosus spiritui: quibus quidē verbis sibi ipsi miser atq; improvidus præiudicat. Verū, quia in aliū sensū dictū accipit, descendamus in medias res, & cominus cōgrediamur. Primū uolens ab honesto suadere, sic scribit.

¶ Quid matrimonio honestius? quod ipse Christus honestauit, qui nuptijs unā cū matre non solum interesse dignatus est, uerū etiam nuptiale conuiuium miraculorum primitijs consecrauit?

Ioa. 2. 2.

Hæc ille adeo uersutē, ut si nobis deessent ad argumentandum loci, uel ab ipso suppeterent. Nos enim longè uerius possumus dicere; Quid cœlibatu honestius? Quid item optabilius, quē Dominus IESVS, non solum honestauit in alijs, uerū etiam sua optione in semetipsum

consecrauit? clarissimè, & efficacissimè indicās, utrum præstantius, qui spreto coniugio, coelibem amplexus & professus est uitam. Quis enim sapiens id per se optet, quod deterius esse nouerit? Nisi forte Cosmophilus, cuius subdolan eloquentiam si forte admiraris, sapientiam certè non potes. Ipse enim, etsi tantopere coniugium coelibatui præferat, & ad hoc te adeo uehementer hortetur, aliud tamen uitæ genus sub coelibatu ipse elegit: certè nomine saltem & fama agamos fuit, cætera coniectare faciliè potes. Neq; est opus ut ego hominem accusem, ipse penitus sese prodit. Mihi id obtinere satis est, indignum esse hominem cui credas, qui quod uerbo laudat, facto ipso non probat.

Verùm ad rem. Honorauit proculdubio Christus sua præsentia matrimonium, non quasi rem multo honore dignam efferret, sed ut relicitam, & propagationi & incontinentiæ plurimorum necessariam defenderet; ne quis postmodo improbare auderet, quod tamen ausi sūt nonnulli hæretici. Nam quæ putamus, ait Apostolus, ignobiliora esse corporis membra, his honorem abundantiorum circundamus: & quæ inhonesta sunt nostra, abundantiorum honorem habent: honesta autem nostra nullius egent. Voluit ergo sua præsentia Dominus matrimonium confirmare, propter necessitatem, & propter

pter hypocritas, qui illud erant reprobaturi: cœlibatum uerò, uelut uitæ statum purissimum, & sanctissimum, etiam in semetipso consecrare. Quòd uero Dominus etiam miraculo nuptias consecrauit, id est, quod dixi, Indigebant eo fauore nuptiæ. Cœlibatum autem nō oportebat confirmare miraculo, cum ipsemet cœlibatus nihil aliud sit, nisi miraculum: siquidem humanas superat uires, animal in carne existens, furem illam, atq; immanem suæ carnis libidinem superare. In carne enim præter carnem uiuere, non humanum est, sed angelicum.

Pergit uersutus rhetor, & ait; Quid matrimonio sanctius, quod ipse rerū parens instituit? Subolfacis quàm futile argumentum? Quid est enim, quod non instituit Dominus? Ergo de quolibet, quod instituit, licebit idem dicere, Quid eo sanctius? Instituit enim regnum sæculare, cū omnis potestas sit a Deo. Instituit & sacerdotale, ac spirituale. Dicit ergo Cosmophilus: Quid sanctius regno sæculari, cum ipsum instituerit Dominus. Sed deprehenditur uiri impietas, qui, ut uires indat huic argutiæ, perinde ratiocinatur hic magister acutus, ac si solum matrimonium, non autem ipsum cœlibatum Dominus instituisset. Nam id, quod expressè non audet, subtracitè innuit, ne ut impius ab omnibus exploderetur.

D. Hieron.
in serm. ad
Paulam &
Eusto. de As-
sumptione
B. Mariæ.

Rom. 12.

Exod. 19. 2.

1. Pet. 2. b.

Postquam autē pro matrimonio dixit, quōd illud rerum ipse parens instituit, adiecit tāquam amplificans: Et quōd natura sanxit: quasi sit maius naturam illud sanxisse, quā naturā parentem Deum, ac Dominum (quod iam proposuerat) instituisse, adeo circumspectus est rhetor. Nota vero, quāso te, vim argumenti admirandam hoc in fundamēto stabilitam. Coniugium est naturale; ergo nihil eo sanctius. At si vis in eo argumento tanta inest, colligere quoq; licebit: Sic & comedere, & bibere, & alia quādam naturā officia explere, quā suo nomine, propter aurium honorem non memorantur, venerabilem, ac reuerendam sanctimoniam, authore Cosmophilo, sibi vendicabunt. An non potius & verius docemus, quōd supra naturam hominis est, præclarius haberi debere, quale est cœlibatus? Nam cum simus natura animales, ac proinde in multis conueniamus cum belluis, certè quatenus naturale est coniugium, idest, illa maris, & feminæ coniugatio, nos homines ipsis belluis æquat. Quid ergo habet præstantiæ, si id solum, quod est naturā cōsideretur in matrimonio, si ea in parte cum pecoribus conuenimus? Nonne præstantior omnino cœlibatus, in quo cum Angelis Dei sociamur? Sed Cosmophilus de Angelis nihil curat, qui naturam à gratia superari, vel non agnoscit, vel potius dignoscere fugit. ○

Pergit, Quid laudabilius, quod qui reprehendit, hæreseos damnetur. Aduerte quàm iterum inconsideratè loquatur. Primum ita arguit, quasi qui cœlibatum reprehendit, non etiã & longè seuerius damnetur hæreseos. & audi quid inde in matrimonij laudem inferat. Tam est, inquit, honorificum matrimonium, quàm infame vocabulum hæretici. Mira argumenti energia, quo simul (ne quod grauius in illum retorqueatur argumentum) concluditur, honorificum valde esse de porcina carne comedere, & anguilla: quoniam hæreticum est pariter hos damnare cibos, non minus quàm matrimonium. Quare similiter inferri potest, tam honorificum esse porcum, & anguillam, adde si vis & ranas, & testudines, & alia huiusmodi comedere, quam est infame vocabulum hæretici. Eia quis puerorum non admiretur tam exquisitum tanti viri acumen & copiam?

Pergit: Quid æquius, quàm id reddere posteris, quod nos à maioribus accepimus? Argutè fatis, sed fac prius istos posteros existere, tunc ipsi iure querentur, si eis nō reddiderimus, quod à maioribus accepimus. Cœlibatu enim nihil posteris adimimus, cum nec sint, quibus quicquã ex illius obligatione debere possimus. Idem habet vitium, quod subdit: Quid ingratius, quã id negare minoribus, quod ipse nisi à maioribus

accepisses, ne esses quidem qui negare posses? Argutula hæc crassioribus ingenijs videri possent, sed eandem continent manifestam deceptionem. Nihil enim debiti ijs negari potest, qui non sunt, nec ex cœlibatu originem trahere possunt.

Prou. i. b.

Pergit à locis communibus vrgens: Quid inhumanius, quàm hominem ab humanæ conditionis legibus abhorrere? Quàm facilè est araneis, exiles suis telis capere muscas, tam frustra iacitur rete ante oculos pennatorum, teste scriptura. Istud semper hæreticorum fuit proprium, distinctiones fugere, omnia permiscere, & confusè loqui. Sic iste purioris vitæ osor, nullam à tempore tempus, nullam à lege legem, ab ætate ætatem, statum à statu, propria cuiusq; distinctione seiungens, totam Evangelij perfectionem obscurat: quid dico obscurat? immo funditus tollit. Quis, quæso, vitam cœlibem eligentium, professus est vniquam se ab humanæ conditionis legibus abhorrere? Qui argentum pro plumbo, aurum pro argento, iustè sibi thesaurizare potest, non ab minoribus abhorret, sed pretiosiora anteponit, non inuitus, sed volens & prudens. Cur non tibi Aporetice, iam sic affecto proponebat tuus iste seductor Cosmophilus, Apostolum Paulum non ab humanæ conditionis legibus abhorrentem, sed saluberrimum consilium sic

dantem? De virginibus autem, inquires, præceptum Domini non habeo: consilium autem do, tanquàm misericordiam consecutus à Domino, ut sim fidelis. Existimo enim hoc bonum esse propter instantem necessitatem: quoniam bonum est homini sic esse. Alligatus es vxori, noli quærere solutionem: Solutus es ab vxore, noli quærere vxorem. Si autem acceperis vxorem, non peccasti. Et si nupserit virgo, non peccauit: tribulationem tamen carnis habebunt huiusmodi. Ego autem vobis parco. Hoc itaq; dico fratres, tempus breue est: reliquum est, ut qui habent vxores, tanquam non habentes sint: & qui flent, tanquam non flentes; & qui gaudent, tanquam non gaudentes: & qui emunt, tanquam nō possidentes; & qui vtuntur hoc mundo, tãquam non vtantur: præterit enim figura huius mundi. Volo autem vos sine sollicitudine esse. Qui sine vxore est, sollicitus est quæ Domini sunt, quomodo placeat Deo. Qui autem cum vxore est, sollicitus est, quæ sunt mundi, quomodo placeat vxori, & diuitus est. Et mulier innupta & virgo cogitat quæ Domini sunt, ut sit sancta & corpore, & spiritu. Quæ autem nupta est, cogitat quæ sunt mundi, quomodo placeat viro. Porro hoc ad vtilitatem uestram dico, non ut laqueum vobis iniiciam, sed ad id, quod honestum est, & facultatem præbeat sine impedimento Dominum

obsecrandi. Si quis autem turpem se videri existimat super virgine sua, quod sit superadulta, & ita oportet fieri: quod vult faciat, non peccat, si nubat. Nam qui statuit in corde suo firmus, non habens necessitatem, potestatem autem habens suæ voluntatis, & hoc iudicauit in corde suo, seruare virginem suam, bene facit. Igitur & qui matrimonio iungit virginem suam, bene facit; & qui non iungit, melius facit. Mulier alligata est legi quanto tempore vir eius viuit; quod si dormierit uir eius, liberata est à lege: cui autem uult, nubat, tantum in Domino. Beatior autem erit, si sic permanferit secundum meum consiliū. Puto autem, quod & ego spiritum Dei habeam.

Hæc ex Apostolo, integra duxi necessariò hic in tui gratiam inferenda, quibus angelicum pectus ab apostatica Cosmophili istius mente clarè possis discernere, ac simul hominis imposturam execrari, qui tanto conatu ad nuptiarum uincula te cœlibatu repudiato satagit pertrahere. Nec dissimulare potest veterator, hanc sibi fuisse ignotam Apostoli doctrinam, cum totum testamentum nouum sexies traduxerit, seu uerius deprauauerit. Tecum igitur hic conferas (si tamen conferre fas est) Apostoli Pauli, & apostatæ Cosmophili de nuptijs, & cœlibatu cōsilia, ac uide quàm parcè ille nuptias non dicò damnet (istud enim hæreticum esset) sed com-

mendet. Si acceperis, inquit, uxorem, non peccasti. At quid inde solatij percipietur? Ecce: Tribulationem carnis habebunt huiusmodi. Perpende cætera ad matrimonium spectantia, & ubiq; deprehendes, coniugio suã mox coniungam servitutem. E conuerso autem optabilissimũ cœlibatus statum, tãtis præconijs extollit, ut pro rei dignitate quasi sibi satisfacere nõ posse uideatur. Nam primo testatur se infidelem fore, si ad hoc uitæ præstantissimum genus non adhortaretur, tanquam misericordiam etiam ad hoc consilium dandum, à Domino consecutum, idq; propter instantem necessitatem: quoniam bonum est homini sic esse. Audis diuersa consilia? Apostolus docet bonum esse: Cosmophilus uerò, omnibus eloquentiã suã uiribus nititur oppositum suadere. Subiungit Apostolus: Solutus es ab uxore, noli quærere uxorem. Cosmophilus contra: Vxorem quære, cœlibatum relinque. Confer tecum reliqua, & faciliè concludes, eam esse Apostoli doctrinam, ut te totum Deo redemptori tuo reddat, & ita consecret, ut sine sollicitudine non diuisus, sed corpore & spiritu sanctus, quæ Dei sunt, cogites. Cosmophilus uerò, ac si in diebus Noe esses, & non sub perfectione Euangelij, & sine huius mûdi, urget ut nubas, tribulationem carnis eligas, sis sollicitus, diuisus, uxori seruias, facultatem

non habeas Dominum sine impedimento obsecrandi. Sentis ne, Aporetice, hostiles sub beneuolentiæ prætextu tibi strui insidias? Recognoscis ab animali homine, nō sapiente quæ Dei sunt, tibi non datum consiliū, sed uenenum propinatum? Venenum dico, tibi sic à sancto spiritu ad cœlibem uitam excitato propinatum, ne calūnietur me nuptijs iniquiorem. Conatur enim te à cœlesti uitæ genere, ad opera nuptiarū auertere. At nos, ut istis suum honorem minimè adimimus: sic nostri cœlibatus statum, longe ex Apostoli, & ipsius Domini doctrina præferimus. Unde hîc concluditur. Qui matrimonio iungit uirginem suam, bene facit: & qui non iungit melius facit: & statim de uidua, Beatior autem erit, inquit, si sic permanserit, secundum meum consiliū. Audi uerò, quomodo rem tantam confirmet, Puto autem quòd & ego spiritū Dei habeam. Itaq; cū aliam Cosmophilus afferat doctrinā, simul aperte prodit, sibi alium adesse spiritum, non apostolicum, sed apostaticum: non cœlestem, sed terrenum, & carnalem.

Habes igitur, Aporetice, detectam hypocritæ fraudem, qui te à sancto proposito detertere studebat, quasi ab humanæ legis conditionibus abhorreret, si uitam cœlibem coniugio anteponeret. Neq; enim est eousq; stupidus, ut nesciat, sed ut decipiat, se scire dissimulat, multa esse diuinæ

uinæ legis, quæ humanam proculdubio, & intelligentiam superant, & facultatem. Nec iam est ulterius indecens, imo plurimum, & omnino decens; ut cum in conditionem diuinæ naturæ euecti simus, ea, quæ sunt humanæ conditionis, alia quoq; uita, & perfectioribus moribus excedamus. Quis iuste quempiam uituperet, qui puerilis immemor conditionis, uiri maturi expleat officia? Audi Doctorem gentium, Cum essem paruulus, loquebar ut paruulus, sapiebam ut paruulus. Quando, autem factus sum uir, euacuaui, quæ erant paruuli. Sed non meminit Cosmophilus eiusdem Apostoli, qui uituperans quospiam, illud ut probum obiecit: Nonne homines estis? Et alibi humana vitia narrans, eaq; quodammodo ab imbecillitate excusâs, ueniam præfatur, quasi dicens: Humanum dico propter infirmitatem carnis uestre. Atqui iste Cosmophilus tãtam sibi authoritatem arrogat, ut, quod Apostolus deprimat, ipse audacter extollere non uereatur.

1. Cor. 13.

1. Cor. 3. a.

Rom. 6. d.

Pergit, & enarrat matrimonij primæuam institutionem, quam non Licurgus, non Moses, non Solon, sed Dominus instituit. Nam, cum hominem è limo finxisset, miseram prorsus, & inamœnâ eius uitam fore intellexit, nisi sociam Euam adiungeret. Tum enarrat, quomodo de costa uiri educta fuit, ut coniugij uinculum inso-

Gen. 2. b.

Ibidem. d.

lubile significaretur. Deniq; quòd eius præceptum continuò audierunt: Crescite, & multiplicamini, & replete terram. Quo in loco exultat, & sibi triumphū canit Cosmophilus, aiens, Quid parentum pietate sanctius? At huic tamen coniugalis præfertur fides. Deseritur pater, deseritur mater, & adhæretur vxori. Filius emancipatus incipit esse sui iuris. Filius abdicatus desinit esse filius: At sola mors dirimit coniugium, si tamen illa dirimit.

Hæc sunt Cosmophili robustissima argumenta, quibus iuxta præscriptam sibi prouinciã, cum depreessione cœlibatus, coniugium efferat. Age verò, videamus paulò accuratius, quid valeant, & quàm robustè concludant. Multa enim frustra congerit, quatenus ostendat, magnum esse illud coniugij nexum. At ea in re cum nemine pugnat. Quis enim christianus hoc vnquã negauit? Imo quis magis hoc docet, & seruat? Ipse Christus hoc præ Mose, & cunctis legumlatoribus nos docuit. Quòd verò Cosmophilus dubitat, an hunc nexum dirimat mors, dicens: Si tamen dirimit mors, viri est planè indocti. Si enim mors non dirimeret, quo pacto liceret, superstiti coniugi cum altero copulari? Verùm hic est quoq; vetus rhetorum mos, multa per hyperbolem iactare, quæ tamen prudentem auditorem non fallunt. Fuisse autem præceptum

primis illis hominibus ut coniungerentur, non inficiamur. Oportebat enim tunc, scz, ab initio creationis mundi, genus humanum crescere, & implere terram. Quid autem inde, sub mundi senectutem inferre vult hic male pius Cosmophilus? num fortè quòd illud præceptum sic ad singulos hominum extendatur, ut cœlibatum de medio tollat? Si hoc ait, ne dum iuris, & legum imperitum, sed simul se ipsum prodit hæreticum. Verba enim ipsa declarant, quid eo præcepto intenderit Dominus, uerz, impleri terram. Vnde nec ab re post diluuium iam delictis cunctis populis, ad eundem finem est idem repetitum. At repleta terra, multiplicatis populis plus satis, datus est cœlibatui locus: ut, ne dum per cœlibatum non solvatur præceptum illud, sed pro sacrificio pleno suauissimi odoris à Domino accipiatur.

Genes. i. d.

Genes. 9. a.

Quòd verò ad matrimonii præstantiam extollendam, obrui etiam pietatem, quæ patri debetur, qua nihil est sanctius, pari inficitia iactat, quòd dictum fuit: Propter hoc relinquet homo patrem, & matrem, &c. hominis similiter imperitiæ ascribamus. Non enim illis verbis aliud enunciatur, nisi quòd conuersatio, & conuiuius cum vxore, antefertur conuiuii, & conuersationi cum patre, & matre, idq; optima ratione. Nam & ipse filius iam maritus, pater familiæ ef-

Gen. 2. d.

ficitur; nec tamē à potestate patris ob hoc emit-
titur; nec ab officijs, quæ erga patrem pietas à
filio deponit, liberatur. Quod item addit, fi-
lium emancipatum sui iuris incipere fieri, falsū
est absoluta consideratione, nisi de ea potestate
intelligat, quæ iuris est civilis, non naturalis. Il-
la enim potestas, quæ iuris naturalis est, emanci-
patione non tollitur. Falsum est & aliud, quod
valde imperitè ait: Filius abdicatus desinit esse
filius, nisi de filio, quem sola creavit adoptio,
intelligat. Itaq; iam, Aporetice, vides quàm
passim, & quàm perniciosè ratiocinando aber-
ret: & hic est, qui solis rationibus fidere se ia-
ctabat, ut mutares sententiam.

Pergit, iam si cætera sacramenta, quibus Ec-
clesia Christi potissimum nititur, religiosa qua-
dam veneratione colantur, quis non videt huic
plurimum religionis deberi, quod & à Deo, &
primū omnium est institutum? & cætera qui-
dem in terris, hoc in paradiso: cætera ad reme-
dium, hoc ad consortium felicitatis: cætera na-
turæ collapsæ sunt adhibita, illud conditæ da-
tum est.

Hæc ad literam Cosmophili sunt, nec alte-
rius quidem esse poterant, quàm Cosmophili.
Vult enim huic matrimonij sacramento pluri-
mum religionis, ac venerationis deberi præ cæ-
teris. Sacrosanctum ergo Eucharistiæ sacra-

mentum, quo nullum potest excogitari excellē-
tius, hac parte superabit coniugij status, vt ma-
gis sit colendus ac venerandus? O impiam pro-
cacitatem. Sed exigamus ab eo tantarum præ-
rogatiuarum rationes. Cur, quæso, tantus ma-
trimonij honor, o Cosmophile, præ cæteris sa-
cramentis? Ait, quodd & à Deo institutum est,
& primùm omnium. Quis non miretur rhetor-
culi eousq; subtilis, & acuti argumentū? Quod
ait, à Deo institutum, quasi verò cætera sacra-
menta non sint à Deo, sed ab aliquo alio inferio-
re authore instituta. At quis, rogo, nisi solus
Deus potestatem habuit sacramenta instituendi?
Sed, inquit, primùm omnium fuit matrimoniū,
Quid mirum? cum alia tunc necessaria non essēt,
imo nec esse poterant? Oportebat enim primo
generari homines, quibus & à quibus ministra-
rentur ipsa sacramenta. Præterea, quid hæc
prioritas temporis confert ad dignitatem maio-
rem? Alioqui, si quid dignitatis haberet, di-
gnior esset circuncisio, quàm baptisumus: lex Mo-
seos, quàm Euangelica: bestia, quàm homo:
terra, quàm animalia, quæ omnia status Evan-
gelici institutionem præcesserunt: quin etiam
præsens vita, esset futura & sempiterna dignior,
cum hanc illa subsequatur. Dicam amplius ad
patefaciendam Cosmophili huius blasphemiam:
imo primus homo Adam de terra terrenus, se-

cundo homine Christo de cœlesti cœlo deberet æstimari dignior, & in vniuersum vmbri & figuris, cedere deberent rerum ipsarum veritates. Perpendis, quibus se laqueis suffocat miser? Prius creatæ sunt à Deo bestię, quàm homo: essent ergo digniores ipso homine. Sed à loco argumentatur. Illud in paradiso, inquit, institutum fuit, cætera in terris. Quid hoc item, ad rei præstantiam, imo quid non ad suadentis damnationem? Nam & Eva in paradiso creata est, non autem Adam. Nunquid ergo ipsa viro suo præstantior, qui in terra nostra creatus fuit? Christus item Deus noster & Dominus, non in paradiso, sed in his terris, & exiguis oppidulis & conceptus, & natus est. Quis igitur, nisi blasphemus, dicere audeat, illius maiestatem inde fuisse imminutam? Quòd si de paradiso sit contentio, certe in vero & cœlesti paradiso, vbi nuptiæ erūt extinctæ, ibi cœlibatus florebit in perpetuas æternitates. Ac licet in illo terrestri paradiso matrimonium sit institutum, nullum tamen matrimonij opus fuit ibi cōsummatum: sed post eiectionem (quod suo non vacat mysterio) cognouit Adam, inquit Scriptura, vxorem suā. Eat nunc Cosmophilus, & celebret, & extollat à loco nuptias, quæ in paradiso Dei cœlesti silebunt, vbi cum Agno immaculato cœlibatus, & alterius generis spirituales nuptiæ, quas nescit

Genes. j.

Genes. 2. b.
& c.

Luc. j c. &

2. a
Matth. 2. a.

Gen. 4 a.

Cosmophilus, nec scire potest, in sæculis sempiternis vigeant.

Quod autem subdit: Cætera ad remedium, hoc ad consortium felicitatis: et, cætera naturæ collapsæ sunt adhibita: illud conditæ datum est, falsam continet omnino doctrinam. Nam hoc matrimonij sacramentum, quod nunc est, & si ad consortium primitus datum est, ad remedium pariter nunc datum esse, oportet necessario confiteri. Audi Apostolum: Propter fornicationem, inquit, unusquisq; suam uxorem habeat; & non ait: Propter felicitatis consortium, quod per prævaricationem primæuam illa felicitate spoliatum est. Qua propter matrimonium, de quo est sermo, post peccatum considerari necesse ut instauratum per Christum, & quod naturæ collapsæ conuenit, non autem incorruptæ, quando libido non inerat, cuius rei gratia etiam sanctius erat. Missa facio quædā alia, quæ subiecit, commodius alteri loco discutienda, ut quæ maximè nostræ causæ astipulantur.

1. Cor. 7. a.

Illud omnino in re tam seria ridiculum, quod ad suadendam præcellam matrimonij dignitatē inducit, uetz, quod in illo elegantissimè figurata est illa excellentissima humanæ naturæ cum diuinæ coniunctio, ut sit sponsus Dominus, & Ecclesia sponsa. Nam si rerum dignitas, cum quid sublime per eas significatur, ab earum significa-

Num. 21. b.

Num. 20. b.

2. Reg 11. a.

Heb. 13. a.

tione deprehenditur, felix igitur ac beatus ille
 serpens aneus, quem Moses in deserto extulit;
 & illa petra beata, de qua fluxerunt aquæ: quo-
 niam hæc significabant Christum. Felix item;
 ac beatum adulterium, quod Dauid patrauit cū
 Bethsabæe: Nam & per illud, insignes Theologi
 docuerunt Christi copulam cum Ecclesia figu-
 ratam. Et quot alijs infimis animalibus & re-
 bus, sunt altissima significata mysteria? Sed hæc
 sunt in mala causa Cosmophili argumentatio-
 nes.

Pergit tamen, & ait. Honorandum connu-
 bium, & torus immaculatus prædicatur ab Apo-
 stolo: cœlibatus hic ne nominatur quidem, nec
 excusatur, quidem nisi compensatione maioris
 boni.

Perspicias & hic, quàm vltro se iste suo cultro
 iugulat? At hoc, quæso, non est plusquàm ex-
 culare? Etenim si maius bonū ē cœlibatu, quàm
 de matrimonio elicitur, quæ exoptari potest
 maior compensatio? quæ persuasionis maior ra-
 tio ad cœlibatum coniugio præferendum? Vi-
 de quàm stupidus argumentator, qui ea spicula
 in nos iaciat, quæ in suū authorem reiecta, eun-
 dem penitus confodiant? Nos enim nō ab aliud,
 matrimonio cœlibatum præferimus, nisi quia
 istius maiore, bono bonum matrimonij compen-
 satur. Quod autem addit, uetz, cum, qui naturæ
 legem

legem secutus det operam liberis, præferendum esse illi, qui in cœlibatu perseverat, nō ob aliud nisi, ut sibi liberius viuat, nemo catholicorum negat. At nos neminem ad cœlibatum ea solum gratia cohortamur, ut liberius quisque sibi & otiosus, sed Deo fructuosius viuat, ex meliore illius electionis parte, quæ nunquam auferetur. Dominus enim ipse est, non mundus, qui dixit: Sunt eunuchi, qui se castrauerunt propter regnū Dei. Propter regnum Dei, inquit, non ut sibi liberius viuant. Si tu igitur huius regni gratia hoc vitæ genus assumes, teq; Deo totum dedices, quid habet Cosmophilus, quod contra mutiat; nisi apertè fateatur, se nullum Dei regnum futurum credere, à quo mentem tuam tanta anxietate nititur auertere?

Matt. 19. b.

Deinceps à legibus hominum incipit suā causam instruere. Lex Mosaica, ait, sterile execratur coniugium, eius rei gratia quosdam voluit à communibus curis esse summos. Vnde & inter benedictiones annumeratur fecunditas; quæ & laudatur in psalmis. Romanæ item leges coniuges ab oneribus immunes ob filiorum numerositatem reddebant. Extrabant & aduersus cœlibes Cæsarum constitutiones, quas tamen, inquit, in fauorem Christianæ religionis Constantinus temperauit.

Gen 49. e.

Deut. 28. a.

Psal. 127.

C. Qui num.
lib. se excu.C. De infir.
pœn. cœlib.

Hæc & alia nuptiarum priuilegia nobis obij-

eit, quibus causam matrimonij præ cœlibatu fa-
 ciat commendabiliorem. Animaduertis, quàm
 esse pergat sui semper similis? Ecce nobiscum
 agit homo christianus, legum paganarum autho-
 ritate: quasi vero non sint, si quid contra cœliba-
 tum sanxerunt, diuino iure abrogatæ. Ac ni-
 hilofecius, vt inscitiam rhetorculi cōtinuè per-
 spicias, nec leges illæ in cœlibatum nostrum
 quicquam statuerunt. Alterius quippe generis
 ille infidelium cœlibatus erat, contra quem fe-
 rebantur, qui non propter regnum Dei, sed ad
 falsam superstitionem obseruabatur. Illud verò
 nonne prorsus hominis stupidi, illas scilicet le-
 ges pro se adducere, quas tamen in fauorem re-
 ligionis Christianæ, Constantinum Cæsarem ab-
 rogasse, seu temperasse ipsemet ore proprio cō-
 fitetur? Quid est hoc aliud, rogo, nisi contra
 christianam niti religionem? At lex Mosai-
 ca, inquit, execratur sterilem. Vide quo vocabu-
 lo rem exaggerat. Execratur, inquit. Quæro
 abs te, homo verè execrabilis, cur locum non
 citas aliquem? Nescis scelus esse sacrilegij, vel-
 le sacræ scripturæ imponere? Nihil enim ha-
 bet illa lex in iudicijs contra cœlibem. An non
 cœlebs Elias, & Elisæus, & alij nonnulli sub illa
 lege constituti? Quid si etiam continentia meri-
 tum, & gratiam apud Deum ex ipsa lege Mo-
 seos coniectare voluisses, & quantum conueniat

D. Thom 2
 2. q. 89. art.
 3. vers. ad
 princ. & ibi
 Caiet.

puræ religioni castitas cœlibatus agnoscere; nō ne spectalles, priscis sacerdotibus operam dare nuptijs prohibitum fuisse, dum sacrificio inferuirent & sacræ aræ? cur ita quæso? vtrum quia sit sanctitas in carnali illa copula, quam tantopere vt sanctam, ter & amplius cōmendat: an potius, quia quædam inerat turpitudine? Si sanctitas, ut ipse vult, certè sanctitas sanctitati non aduersatur: erat ergo turpitudine, & profanitas quædam carnis opus, sanctitati repugnans. Ob eam causam de panibus propositionis à sacerdote non prius quicquam datum fuit David & socijs comedere, etiam maxima esurie, nisi prius se ab heri, & nudius tertius à mulieribus abstinuisset testati essent. Quàmquàm, quid oportebat lege inniti mosaica, cum illa vtpote carnalis, multa cōcederet carni, quæ postmodum adtentanti spiritui meritò cederet? propter quod & præscriptum fuit. Dedi eis præcepta non bona, & iudicia, in quibus non viuent.

Adiungit eadem argumentorum stupiditate pœnas, quibus matrimonij violatores per leges plectuntur. Sed quid hoc, ut præstet matrimonium cœlibatui? quasi cœlibatus uiolatores nō sceleriosius agant, quàm qui uiolant iura coniugij. Illi enim fidem Deo datam irritam faciunt; isti fidem homini promissam franguunt. Quòd autem leges, quæ his priuilegijs fauent matri-

Leuit. 8. g.
1. Paral. 24
Hoc etiā testatur Sircius Papa in epistola ad Himerium Tarrac. episc.
Hoc idem Innoc. pri. in episto. ad Exuperium Tholos. episc.

1. Reg. 26. b.

Ezech. 20. d.

monijs, optima ductæ sint ratione, aperit nobis Cosmophilus: quoniam, inquit, matrimonio immortalitas accepto ferenda est. Quid autem immortalitate felicius?

Vere Cosmophilus hic ostendit, quàm male formatus fuerit doctrina Christi: imo prodie se armatum contrà eiusdem doctrinam, nec credere mortuorum resurrectionem, futurum extremum iudicium, nec aliam vitam æternam, cū asserat per suum matrimonium fore in hoc exilio vitam immortalem. Sed seducere omnino satagit. Non enim tam fuit hebes, ut ignoraret morti omnia subijci, & quòd ipsa vniuersa terra, & ipsi quoq; cœli peribunt: nec ultra erit generatio, & corruptio, cum nouissîma tandem inimica destruetur mors. Ecquam igitur hic homo immortalitatem somniat à coniugio, quod & ipsum peribit? Nam in illo immortalis beatitudinis regno neq; nubent, neq; nubentur, sed erunt sicut angeli Dei.

1. Cor. 15. d.

Matt 22. c.

Illud æque stupidi est ita loqui, & perinde argumentari, ac si forte tu Aporetice, spreto matrimonio cœlibatum amplectaris, totus mundus confestim sit periturus. Sed cur non perijs Cosmophilo ipso, qui lætam & iocundam, absq; matrimonio vitam elegit? Constat enim illum nunq; duxisse vxorem, ac proinde malè immortalitati consuluisse, quam tamen tam sancto ma-

trimonij opere promouere debuisset, si immortalitati mortem infert cœlibatus. Turpe siquidem est doctôri, cum culpa redarguit ipsum. Sed latet anguis in herba: quia hic Cosmophilus, cū animæ immortalitatem, imo nec Deum esse cum suo Luciano crederet, eam immortalitatem intelligi non obicure voluit, quæ more pecudum, generatione indiuiduorum perpetuari posse credebat. Qui enim firmiter credit istius mundi futuram consummationem, quam potest per matrimonij opus immortalitatem polliceri? Quomodo seruabitur fidei catholice de resurrectione carnis articulus, si caro per matrimonium immortalitatem consequatur?

Redic iterum ad naturæ legem, euangelica semper suppressa, in qua extollenda latissimè spatiatus, nihil tamen solidi proferens, cœlibes facit cæteris animantibus deteriores, quòd ij spernant coniugij legem, illa autem seruent. Et, vt magis moueat, seu verius ludat, & deludat, latius patere coniugium inquit, & in arboribus inueniri, imo & ipsum cœlum quasi terræ maritum obijcit, cuius influxibus terra prægnans effecta, tot tamq; varios fructus nobis producit?

Hic miror non exclamasse hominem, o, cœlum, o, terra, vt & superos contra cœlibes, & inferos prouocaret. Verum, vt rationabiliter,

& naturaliter loquamur, si cœlibes non longè sanctiore coniugio, & cum pulchrioribus cœlis copularentur, plurimum valeret ista Cosmophili allegatio. Sed euangelica, & spiritali doctrina loquendo, sicut sunt fructus carnis: ita sunt & multò diuiniore spiritus fructus, & ad utrosq; proferendos sua sunt à Deo prouisa, & præparata coniugia. Est terra, quam cernimus oculis, & terimus pedibus, quæ & manibus colitur, & hæc per cœlorum influxibus quasi grauida & fœcunda ea nobis gignit, quibus viuunt mortalia corpora cum hominum, tum etiam pecudum, sed ad vitæ spatium mox periturum. Est verò & alia terra humanorum cordium, quæ & ipsa disponi debet, & ita coli parariq; à nobis, quò beatiores sublimiorum cœlorum influxus concipiens, etiam fructus longè pretiosiores producat, quibus felices animæ ad æternam beatitudinem saginentur. Sed quid infideli Cosmophilo cum ijs cœlis, hoc est, cum beatis spiritibus? Nihil profecto, nimirum qui ex eorum numero effectus erat, qui mittentes manum ad aratrum, respexerunt retro, & iccirco minime sunt apti regno Dei. Non mirum igitur si iste, nec spirituale nouit coniugium, nec eius fructuū solidam sensit vnquam dulcedinem.

Vt autem in cœlibes etiam maiorem concitaret inuidiam, ad fabulas poetarum cōuertitur.

Gigantes imprimis nobis obijcit illos anguipedes terræ filios, qui bellasse cum dijs feruntur, sed fulmine istos à Ioue corruisse. Per hos autem significari ait immanes quosdam, ac feros & obscuros homines, qui à coniugali concordia abhorrentes, legi naturæ repugnarunt: quod est pugnare cum diis, ipsius naturæ authoribus. Quare è conuerso inducit & Orphæum qui cantu & cithara, ad se saxa durissima è syluis traxisse fertur: quod est homines saxeos à vago concubitu ad locieratem coniugalem adduxisse.

Ouid. Met.
lib. j.

Ouid: Met.
tam: lib. x.

Hæ fabulæ, si nobis pro fabulis opponuntur, etiam ut fabulæ iure sperni quæunt: sin autem ut à sapientibus consistat, ut inde nos aliquid præcepti, & doctrinæ ad ædificationem morum sumeremus, illam Cosmophili de Gigantibus interpretationem, ut valde ineptam & crassam, imo ut cõtumeliosam, & in sanctos Dei impiam non recipio: Sed illam Macrobiani potius probō, quam Cosmophilus quidem (utinam, ut vir multæ lectionis, ita & multæ pietatis) minimè ignorabat. Verùm, quia contra se militabat, callide dissimulare voluit. Ait enim libro Saturn. primo ille auctor. Gigantes quid aliud fuisse credendum est, quàm hominum quandam impiam gentem Deos negantem? & ideo existimaram Deos pellere de cœlesti sede voluisse, horum pedes in draconum uolumina desinebāt:

Macrobiani lib.
i. Satur.

quod significat nihil eos rectum cogitasse, totius
 uitæ eorum gressu, atq; progressu in inferna uer-
 gente. Hæc ille. Quæ interpretatio quàm pul-
 chrè Cosmophilo congruat, quem esse unum ex
 his Gigantibus, etiam si fama taceret, hæc ta-
 men; & alia plura ejus impia dogmata, quæ in
 uariis opusculis suis sparsit, satis facerent mani-
 festum: Nam pèrpende, quæso, quanta & de
 cælo, & de terra, & de montibus, & de saxis,
 ad cælibatus extirpationem congerat argumen-
 ta, quem tamen amplexus est Christus, & Ioan-
 nes Baptista, & olim Elias, & Elisæus, & alii
 propemodum innumeri, quos ob cælestem uitã
 in terris exactam, Deos nominare fas est; nimi-
 rum quibus probè diuinum illud elogium con-
 uenit, quo dicitur: Ego dixi Dii estis, & filii ex-
 celsi omnes. Contra hos autem cælestes uiros
 hac tanta procacitate insurgere, quid est aliud,
 quàm uerè cum Diis pugnare? Sed merito his
 Gigantibus contingit, ut tonitruis, & fulgure
 Euangelii Dei percussi, corruant in profunda
 præcipites. Nam quod de saxis, Orphæi cantu
 conciliatis interpretatur, homines saxeos à ua-
 go concubitu ad sanctissimam matrimonii legè
 esse adductos, nihil contra nos facit. Libenter
 enim concedimus, & cupimus homines duos à
 uago concubitu abstrahi, & legitimas subire
 connubii leges: quod si fecisset Cosmophilus,
 nec simul

nec simul semper superexcellentem nostri euangelici coelibatus prærogatiuam insectatus fuisset, etiam illum hac parte laudibus prosequeremur: sed nolumus, nec tolerare debemus, eos sanctissimos viros inter saxa annumerari, qui spiritu Dei, & propter Deum acti, omnem carnalem concubitum contempserunt, quorum te, Aporetice, exemplum percupimus & æmulari, & imitari: non autem ob Cosmophili imposturas spiritum, qui tibi meliorem partem suggerit, à te extinctum iri. Audi Apostolum execrari Cosmophili vocem: Spiritum, ait ille, nolite extinguere.

1. Thess. 5. c.

Verum, quoniam religio est, christianum hominem his fabulosissimis fabulis intendere; cætera consulto omittam; quæ de Orpheo & de Euridyce quàm ab inferis reuocauit, adiecit; & quæ de Ioue Gamelio, & Iunone Pronuba, & Lucina: quæ omnia vel eo solo nomine; quod sunt à falsorum deorum, & profanorum ac infidelium hominum exemplis sumpta, suum citatorem, cuius fuerit fidei plus satis patefaciunt, qui suppressis nouæ legis, & euangelicorum virorum testimonijs, & exemplis, ad saxa nos, & virgulta, & insuper ad bestias imitandas transferre toto conatu satagit: perinde ac si vnus, & idem esset hominum, & iumentorum ortus, & interitus, iuxta impiorum vocem à Scriptura meritò da-

Eccles. 3. d.

annatam. At nihilosecius, vt confusionem suam agnosceret, quot, & quantas possem ego, si hoc Theologum deceret, alias fabulas multò etiam aptius in fauorem cœlibatus inducere? Sed sancta, & perspicua christianorum doctrina, meritò hæc peregrina, tanquam suspecta testimonia dedignatur.

Ad bestiarum, inquam, æmulationem cohortatur. in quibus mirificos copulæ maritalis ostendat effectus, turtures & columbas omittens, ipsos ferocissimos leones in vxores suas adducit mites, Tygrides pro suis catulis dimicantes. Asinos, inquit, per obstantes ignes agit prolis tuendæ pietas. O felices asinos, quorum pietas, aut furor religiosus ac pius, stylo Cosmophili tam lepidè celebratur, & in egregium effertur exemplum, vt inde sapiant homines. Pari animositate & equos & mulos & bestiarum genus omne poterat adducere. Dabit tamen nobis Cosmophilus sua benignitate veniam, si potius audierimus prophetam dicentem: Nolite fieri sicut equus & mulus, in quibus non est intellectus.

Psal. 31. c.

Quod verò & legem matrimonij seruare leones in vxores suas prædicat Cosmophilus, ipsius impudentiæ damus: & quod adiecit; nullam gentem adeo barbaram, adeo feram vnquam fuisse, quæ non sanctum ac venerandum putarit

esse coniugium, merum est omnino mendacium, nisi de coniugio illo loquatur, quod cum feris habet homo commune: alioqui multi sanctitatem coniugij, & diuortijs, & concubinis, & pluralitate vxorum, & incestibus, & alijs indignis copulis, quas pro legitimis habebant, indignissimè commacularunt: immo verò, non solum barbaræ gentes, sed & nonnullæ Respublicæ, & qui habitati sunt grauissimi philosophi, legitimū matrimonij vsum repudiandum, mulieres debere esse communes docuerunt, & sanxerunt. Et si quæ animalia aliquid inter se fidelitatis (sed hæc sunt admodum rarissima) seruare dicantur, id potius ad præstantiam celibatus spectat: vt de turturibus, quorum superstes nullis repetitis nuptijs, in luctu perpetuo cœlebs vitam finit. Itaq; huiusmodi non minus mendax, quàm fallax argumentorum genus, ad conciliandum matrimonium, nedum quicquàm uirium habet, quin potius suam illi dignitatem (si ea est à saxis & bestijs confirmanda) funditus tollit. Quid enim sanctitatis habeat uerum coniugium, nemo nisi solus christianus unquam nouit. Vnde & in Christi lege nullum matrimonium ratum habetur, nec est sacramentum, nisi fuerit inter fideles initum.

Itaq; cum passim ea Cosmophilus effutiat, quæ nihil momenti ad suadendum habeant, eius

Pomp. Me-
la. de Gara-
man.
Plato de Re
pub. lib. v.
Pluto in vi-
ta Licurg.

Aristot. de
Hist. anim.
lib. 9. c. 7.

D. Ambr. de
Patriar. lib. 1
cap. 9. rela-
tus, 28. q. 1.
can. 15. cum
sequen.

ipsius accipio consilium, non oportere de quolibet prolato sollicitari, in quo nihil sit quod habeat quicquam solidi.

Sunt tamen quædam, quæ religionis gratia non sunt omittenda, quale est illud: Nullus ciuis egregius habitus est, qui non liberis gignendis atq; instituendis operam dederit, ut cognoscas, quàm totus huius mundi sit iste homo, qui oculos parumper ad cœlestem ciuitatem extollere non ualeat: alioquin planè cerneret, ibi nullos ferè magis egregios esse ciues, quàm qui operam non dederunt liberis. Nam hi, agnum quoruncq; ierit concomitantur, ait dilectus, virgines enim sunt.

Apoc. 14. a.

Illud item, quod producit, Hebræos, & Persas, quos ea in parte laudat, quòd etiam simul plurimas habuerint vxores, nunquid christianū tibi an belluinum potius videtur? Scimus aliquot olim priscos patriarchas ab Abraham, operam dedisse liberis, & plures habuisse vxores, quod factum excusationem quidem tum ratione temporis ob necessitatem propagationis; præsertim in gente hebræa habuit; laudem verò (nisi nunc ab impijs, & Cosmophilo) nunquam. Quocirca, & quæ de Abraham, & Iacob commemorat, inualida sunt ad suam causam.

Quod verò de Salomone adiungit, impudentia est, qui cum sapientissimus fuerit, nihil illius

sapientiæ plus detraxit, nullâ res turpiorem illius nomini maculam inussit, nisi illud nimium cum mulieribus consortium. Testis est scriptura ipsa, quæ ait: Cum iam esset senex, deprauatum est cor eius per mulieres.

3. Reg. 11. a.

Adiunxit & Socratem, qui omisso cœlibatu elegit connubium: At ille Apollinis oraculo sapientissimus pronuntiatus est. Verè Cosmophilus hoc in loco videtur arbitrari se tecum agere, tanquam non cum viro christiano, cum ad tibi suadendum contra cœlibem vitam coniugium, Idolorum nitatur oraculis: Vbi non obscure potes hominis etiam atheismum recognoscere, qui postposito filij Dei viui oraculo, & exemplo, te ad Apollinis Satanæ simulacri oraculum amplexandum instigat. Verum enim uerò quod uxorem duxerit ille, quam inde insignis sapietiæ eminentiam ostendit? quæ si est aliqua, nonne communem illam habuit cum multis? Nec tamen negamus, eum vel ea in re prudenter egisse, qui cum experiretur acres libidinis aculeos, melius esse censuit copulari, quam vri. Etenim natura eum libidinosum fuisse, literis proditum est. In eo verò, quod morosam uxorem patienter tulit, libenter illius sapietiæ ascribimus, qui è duobus malis leuius elegit tolerandum. Non enim præstabat pugnare cum belluis quotidie. Sed quid hoc cœlibatui officit, ut ma-

A. Elianus.

rimonij commoda, commodis cœlibatus anteponantur? imo verò hoc ipsum egregie pro ipso cœlibatu facit, qui ijs caret domesticis, & intestinis, & supramodum molestis rixis, regnum veræ sapientiæ, in mente viri sapientis pellundantibus.

Nunc ad aliud argumentationis genus paulò accuratius, quæso, respice, mi Aporetice, ut ceretò, & perpetuò deprehendas, quàm nihil sit in hoc rhetorculo christianæ religionis.

Præmittit primùm, Deum, & naturam nihil frustra facere. Tum adijcit. Cur hæc membra tribuit? cur hos stimulos? hanc vim generandi? si cœlibatus per se laudi ducitur? Si quis te magnifico munere donaret, arcu, veste, gladio, indignus accepto videberis, si uti eo aut nolles, aut nescires. Cum enim cætera omnia tanta sint ratione constituta, haud verisimile videri debet, hac vna in re naturam dormitasse. Hactenus Cosmophilus.

Tu verò numera quot differentis errores, tot blasphemias, & impietates. Primùm, putat frustra illa membra data, si eorum defuerit ad hanc operam usus. Quis ad hanc uocem uehementer non perhorrescat? Nec ipsi Christo, nec sanctissimæ Virgini illius matri, nec cœlesti & angelico homini Ioanni Baptistæ parcit: quin ulterius concedere cogitur, in futuro cœlestis bea-

ritudinis paradiso, uel hæc membra non fore, quod est hæreticum: uel si futura sint, etiam fore nuptias, & carnales copulas: & istud iterum hæreticum, & mahumetanum est, contra expressum ipsius Christi uerbum aientis: In resurrectione non nubent, neq; nubentur, sed erunt sicut angeli Dei in cælo: Aut certè, ut uerè atheos se futuram uitam negare profitebitur. Ad hæc, non omnino illa membra frustra erunt, etiam si absit opera coniugalis, quæ iam legitimum usum à quibus oportuit, consecuta est in uia, non ulterius exercitanda in patria, ubi erit status omnis felicitatis plenitudine perfectus. Tertio, finis ille propagationis, non à singulis eam operam exposcit. Satis enim est eam à multis exerceri pro cōseruatione indiuiduorum & ciuitatum, quando sapientissimo Domino Deo durare mundum placuerit: quod certè, saluo celibatu, diu factum uidemus. Plenus est enim totus orbis terrarum gentibus plus satis. Imo uerò urgente, & instante huius mundi deprauatione, & finali destructione, ad accelerandam suæ iustitiæ ultionem prouocabitur omnipotens Deus, quoniam tunc homines, sicut in diebus Noe, edent, & bibent, & tradent ad nuptias, ut ipsemet predixit. Et quemadmodum olim immissum est diluuium, sic futurum tunc eadem de causa peruagabitur incendium.

Matt. 22. c.

Matt. 24. d.

Genes. 7. b.

Luc. 17. f. 1.

Corin. 3. c.

2. Petr. 3. b. c.

Deniq; , quod longè est grauius, hæc doctrina palàm fidei nostræ fundamenta subuertit. Ipse enim hos stimulos ueneris, & hos carnis æstus, naturæ esse bene institutæ; non autem à peccato corruptæ, ipse suis uerbis exprimere homo non minus audax, quàm etiàm impius nō dubitauit: nam post superius annotata subiicit hæc uerba.

Nec audio, qui mihi dicat fœdam illam, & obscænam pruriginem, & Veneris stimulos, nō à natura sed à peccato profectam. Quid tam dissimile ueri? Quasi uerò matrimonium, cuius munus sine his stimulis peragi nequit, nō culpam præcesserit. Nam in cæteris animantibus unde illi stimuli? à natura, an à peccato? Mirum, nī à natura. Postremò nos imaginatione fœdum reddimus, quod sūapte natura pulchrum, & sanctum est. Alioquin si res non opinione uulgi, sed ipsa natura uelimus expendere, cur minus fœdum brutorum animalium more edere, mandere, coquere, excernere, dormire, quàm licita permittaq; uenere uti? Hæc sunt Cosmophilæ axiomata.

Negat igitur imprimis, ut Cynicus, rei fœditatem, & obscænitatem, quam tamen ipsamet nos docet natura, qua duce & magistra non solum hæc membra sollicitè, tanquam pudenda occultamus, sed etiam illam eorum operam multò

multò magis, ut nulla sit tam perfrieta fronte, & deploratæ impudentiæ meretrix, quæ turpia illa non nisi sub fornice atq; in abscondito perpetrari audeat: & cum hæc ita sint humano pudori à naturæ instinctu impressa, atq; insita, hunc tuum tamen suasorem non pudet sua quadam non humana, sed verè canina opinione, & imaginatione asserere; turpe, ac fœdum humana imaginatione esse redditum, quod est suapte natura pulchrum, & sanctum. Verùm quid huic tam immanī, ac robusto giganti opponemus, nisi sanctarum fulmina scripturarum, quibus illum dedamus cum suo dæmone præcipitem, à quo talia est edoctus? Responde nobis, si potes, o Pelagiane Cosmophile, qui ais hanc fœditatē, unde erubescimus, non à peccato, sed ab hominum opinione profectam? Quid est ergo, quod Scriptura tam disertis verbis præmittit de primis hominibus ab initio: Nudi erant, & non erubescant? Et deinde post peccatum dicitur, quòd agnouerunt se nudos, cumq; inciperent erubescere. cōsuerunt folia ficus, quibus sibi facerent perizomata. Hæc certè legerat iste nouus Cynicus, qui (ut superius vidimus) matrimonium Adæ, & Eux in suæ causæ corroboratiōē produxit: sed hanc erubescētiā callidus, & vaser pro more dissimulauit, aut præ vecordia non intellexit, quod erat adedò clarum; aut certè

Gen. 2. d.

Ibidem. 3. b.

perfidia spreuit, quod ab omnibus orthodoxis scriptoribus erat traditum.

Sed ait: Quid tam dissimile veri? quasi verò matrimonium, cuius munus sine his stimulis peragi nequit, non culpam præcesserit? En, ut pergit destruere fundamenta christianæ fidei. Verè matrimonium culpam præcessit, sed non ij effrenati stimuli, qui modo insurgunt. At matrimonium sine his stimulis, inquit, peragi nequit. Perpetuò cōfused, & absq; distinctione loquitur. Hoc quidem verum est, sed post peccatum: nam: antea hi stimuli nequaquam fuissent, & tamen absq; illis opera matrimonij cum omni rationis tranquillitate exercita fuisset. Ratio enim, & pars superior Deo subdita fuisset: rationi autem partes inferiores ad nutum paruissent.

Pergit Pelagianus superiora probare, & ait. Iam in cæteris animantibus, vnde illi stimuli? à natura, an a peccato? mirum ni à natura. Nos autem fatemur, verè cæteris animantibus à natura, non à peccato.

Quid ergo? Ita ne oportuit etiam inesse hominibus, d, animale[m] hominem, qui quod conuenit animantibus natura, id putat & hominibus in naturæ rectitudine constitutis conuenire, perinde ac si instar pecudum nulla præditi ratione ferri, & impelli in suas operationes debuissent: sed id ad decipiendum incautos, & car-

nales homines loquitur. Neq; enim credendum est, illi fuisse ignotam ex antiquo peccato nostræ deiectionis causam, quam propheta tam aperte deplorat inquiring, Homo cum in honore esset, non intellexit: comparatus est iumentis insipientibus, & similis factus est illis. Vide quàm indoctè argumentatur. Ab eo, quod minus & infimius est; id vult concludere quod est maius & dignius: quia, scz, cæteris animantibus insunt à natura stimuli; ergo & hominibus. Poterat similiter & de multis dicere: Si ea insunt hominibus; ergo & Angelis. Atq; vt decipiat, anticipi vocabulo naturæ abutitur. Nos enim fatemur natura hosce stimulos nobis obuenire: sed à natura lapsa, & corrupta, quam sic infecit peccatum, non Deus. Nam ante peccatum sub naturæ integræ statu, minimè in nobis fuissent hi molesti stimuli; sed omnis nostrâ actio sub rationis imperio, rationis imperium sub Deo (vt paulò antè dictum est) felicissima harmonia persisterent. Sed vt sui argumenti inutilitatem conspiciat; Respondeat, quæso, versa vice cum interroganti. Mors in cæteris animantibus à natura est, an à peccato? proculdubio dicet à natura. Et nunquid patietur aliquem hinc inferre; ergo similiter in hominibus est à natura, non à peccato? cum dicat Apostolus, Sicut per unum hominem peccatum in hunc mundum intrauit,

Psal. 48. e.

Rom. 5. b.

& per peccatum mors ; ita mors in omnes homines pertransijt ? Id opinor. concederet Cosmophilus , eadem enim vis est in syllogismo : & tamen vtrumlibet concedens , aut Pelagianum se indicaret ; aut certè Atheon , qui originalis culpæ pestilentem labem non agnoscit.

Gal. 5. c.

Peccat similiter & aliud argumentum , quo probare contendit , cœlibatum idcirco virtutis non mereri nomen : quoniam nulla potest dici virtus , quæ cum natura pugnat . Etenim cum in nobis sic natura , qua cum asinis conuenimus , & cæteris pecudibus , quid prohibet virtutes cum huiusmodi natura pugnare ? Audiamus quid Apostolus doceat : Caro , inquit , concupiscit aduersus spiritum , & spiritus aduersus carnem . Itaq; si cuncta , quæ cum natura pugnant , virtutis nomen , iuxta istius dogma mereri nequeunt , vitia in virtutum possessionem & regnum subintrabunt , vitiorum nomen virtutes merebuntur . Quemadmodum enim cœlibatum vult haberi in vitio , quia naturæ stimulis non obsequitur ; ita cæteræ virtutes , quæ cum naturæ stimulis pugnant , iam virtutum non merebuntur nomen .

Vt enim natura in qua nunc constituti sumus , stimulos ad libidinem , & corporum cōgressum habet , nonne pariter habet ad superbiam , auaritiā , iracundiam , gulam , laborum fugam , de-

fidiam. & cætera flagitia, quibuscum, si christiani esse velimus, assidue nobis confligendum est? De vera igitur natura loquatur, corrupta seu reparata, astrictus suo laqueo tenetur Cosmophilus. Nam si corruptæ naturæ stimulis frena laxanda concesserit, euadet homo omnibus brutis animantibus longè inquinatior, atq; immanior. Si autem ad reparatam referat, quid excellentius, quidue potest eligi diuinius, quàm per virtutum studia, maxime per cœlibatus arma de naturæ fomite in carne sua triumphare, & ex humana, ac terrestri conditione in spirituale, & cœlestem euadere? Perspicias, Aporetice, in quod nam confusionis barathrum se miser ille suasor præcipitem dedat, & te quoq; dedere cupiat, dum excellam cœlibatus puritatem, nomine virtutis spoliare, & suos stimulos præferre, & tibi eouq; commendabiles reddere contendit? Sed iam hanc missam faciamus imposturam. Nam si horum stimulorum pugnam subire detrectauerit, iniquum prorsus est eos qui adiuvante Deo, superarunt, & assidue superant, ad suam regulam, & inertiam velle metiri.

Verùm quò se verè gigantem ostendet, argumentum illud præoccupando remouere conatur, quod maximi erat contra se ponderis. Sed Apostolorū, inquit, institutum te delectat, qui & ipsi cœlibatum sunt secuti, & alios ad id

vita genus sunt cohortati : quamquam & Apostolis aliquot fuisse vxores constat. Quid tu apostolicum institutum sequeris, ab apostolico munere longè alienissimus, homo nimirum & profanus, & priuatus ? Illis hoc veniæ datum est, ut uacarent à coniugij munere, quò magis uacaret copiosorem prolem Christo gignere : Episcopis cœlibatum concedamus, (& quod excurret.)

Vbi sub paucis uerbis plurima errata graua, & perniciosas deceptiones licet perspicere. Primum, quod ait. Illud apostolicum institutum, fuisse proprium apostolicorum uiro- rum, quos oportebat huc, illuc: hac, illac ad promulgandum euangelium discurrere, & ob eam causam minimè poterant prædicationi simul, & uxori satisfacere, falsò & ad euasione, uerius ad eersionem dicitur. Neq; enim hoc institutum obseruabant, duntaxat ipsi & profitebantur, sed & alijs omnibus, qui amplecti uoluissent, suadebant, & persuadebant, licet ad excellentissimum munus illud apostolicum non essent electi. Vnde & ipse B. Marcus Euangelista hoc genus Euangelicorum eunuchorum, qui in monasterijs laudantes Deum commorarentur, in Alexandria congregauit, & certas leges, ac instituta, ad quorum normam uiuerent, instituit: quod idem & alij Apostoli efficiebant, non so-

lūm mares, sed etiam feminas ad eam uitæ perfectionem sectandam feruenter cohortantes, & congregantes, ut narrant fidelissimæ ecclesiasticæ historiæ. Quod uerò constare ait, nonnullos Apostolorum habuisse uxores, ad deceptionem facit. Tacet enim, & supprimit illos, postquam secuti sunt Christum, etiam antequam apostolico munere fungerentur, à copula coniugij abstinuisse, iuxta omnium sanctorum doctrinam, & ecclesiæ catholicæ irrefragabilem traditionem: imo ex illiusmet hîc citato testimonio. Explo-
denda uerò omnino uenenosa illa ironia, quam irridens adijcit. Sit istud, ait, sacerdotum, ac monachorum priuilegium, quos apparet in Es-
senorum institutum successisse. Priuilegium primò uocat, quod uult non esse uirtutem, sed uitium. Deinde ad maiorem contumeliam, pri-
scum genus, genus inquam, superstitiosum & reprobum, transfert in noui testamenti sacerdo-
tes, & monachos; qui tamen uerè sunt genus ele-
ctum, regale sacerdotium, gens sancta, populus acquisitionis, renati non ex semine corruptibili, sed incorruptibili per uerbum Dei uiuentis, si-
cut ait Apostolorum princeps. Nam ab ipso Christo hic celibatus institutus, & ab Apostolis receptus, ad nos ab eisdem perpetua temporum serie processit. Quò fit, ut ipse Cosmophilus, uel hoc in loco uerè se Sadducæum declaret, &

D. Matt. vt
in eius vita.

Euseb. hist.
Eccl. lib. 2.
cap. 17.

Hieron. con-
tra Iouin.
lib. 1.

1. Pet. 2. b.

ex numero illorum unum, qui nullam futuram
ut iterum dicam, expectant resurrectionem, nec
postremi iudicii diem: sed ad impiam illam sen-
tentiam finem vitæ referunt: Comedamus, &
bibamus, & nuptias, & carnis delicias celebre-
mus: cras enim moriemur. At hos, ut pronun-
tiat Dominus, obruet improvisa, ac repentina
calamitas.

Esaï. 22. d.

1. Cor. 15.

Luc. 21. f.

Matt. 19. b.

Quoniam uerò illa Domini sententia preme-
batur: Sunt eunuchi, qui se castrauerunt pro-
pter regnum Dei, nec ullo modo elabi poterat,
uasrè subdidit: Non reiicio auctoritatem, sed
sententiam interpretor. Primum arbitror, in-
quit, hoc Christi dogma ad ea tempora potis-
simum pertinere, cum oportebat cursitare per
omnes terras, & undiq; imminebat persecutor:
Et præterea per eunuchos etiam posse significari
coniugatos audeo asserere. Sed de quibus nam
fontibus hic tam singularis doctor falsas huius-
modi interpretationes hausit, cum omnis Ec-
clesia, & uniuersi Scripturarum tractatores se-
cus interpretati sint: quineriam, & uis ipsa uer-
borum tam apertè repugnet? Eunuchis enim
quârum ad procreationem prolis, omnis omni-
no nuptiarum amputatur facultas. Nunquid
cunctis doctoribus catholicis anteponeretur istius
gigântis auctoritas, satisq; pro omni ratione erit,
quasi alterius Pythagoræ responsio, Ipse dixit?

Minimè

August. de
sancta Vir-
ginitate, &
alij.

Minimè uerò : quin potius fulmine cœlesti , & apostolico uerbo ictus corruet , illò scilicet , quò serio admonet eos qui uere sapere uelint , tanto esse debere expeditiores , & abstinentiores , quā Luc. 21. g.
 to propinquior dies ille instat , qui repenti i. Thessal. v. 2
 nus adueniet , ne nos incautos deprehendat , & 2. Petr. 3. c.
 somnolentos.

Quòd uerò tuus Aporetice status , quem profanum , ac priuatum vocat , aliud postulet , merū mendacium est , & grauis cōtūmelia. Quis enim nisi uetè profanus , profanum eum vocare ausit , qui dignitate christiani nominis sit insignitus , & Christi membrum effectus ? Cœlibatum uerò sacerdotibus , & Episcopis fateor necessariò cōuenire : hoc enim decor Ecclesiæ , & ipsa administrandi sacramenta maiestas ueneranda , ac diuini uerbi prædicatio suo iure exigit . Priuatis autem ita demum cōuenire asseueramus , si optant ipsi hoc sanctioris uitæ genus , ac simul se proprio voto eidem sic astringant , ut recedere nequeant ab hac ipsorum obligatione Deo seruienti . Episcopis autem , & sacerdotibus ab ordine , atq; officio hæc sit imposita cœlibatus seruandi decentissima obligatio : quamquam & monachorum status est eius naturæ , ut impossibile sit esse monachum , & illum voto euangelico non castratum . Quòd itēm tibi tanquam homini profano & priuato , excellentem Apostolorū ,

& apostolicorum virorum imitationem, minime esse æmulandam cautus amicus suadere molitur, id efficere intendit vt te velut stupidum, etiam ad vitam bestijs simillimam adigat. Pari enim argumento, quo te ab heroicis euangelicæ perfectionis virtutibus, ob illarum sublimitatem reuocare contendit, etiam liberales scientias, & ipsas quoq; artes mechanicas fugiendas censet. Poterit siquidem insignes authores, vt Aristotelem in philosophia, Tullium in rhetoricis, & eloquentia, Apellem in picturis. Euclidem & Vitruuium in mathematicis structuris & ædificijs & huiusmodi allegare, ad quorum excellentiam si aspirare volueris, despondere animum erit necesse. At Redemptor noster exemplum discipulis dedit, vt quemadmodum fecit, & ipsi facerēt. Apostolus quoq; vt ipse Christum imitabatur, ita ad sui imitationem cohortabatur. Idem docuerūt quotquot floruerūt in ecclesia eximij vitæ sanctioris patres & doctores. Neq; verò inuitamur, vt Christi plenitudinem cōsequamur, quod esset blasphemum. Ipse enim est fons inexhaustus, & summa atq; infinita plenitudo, de qua omnes, tanquam singula vasa, sed finita, suam quæq; plenitudinem ad mensuræ propriæ captum acceperunt. Nec à quoquàm requiritur, nisi, vt implere studeat vās suum ad proportionem suo statui conuenientem.

Ioan. 13. b.

1. Cor. 4. d.
& 11. a.

Hieron contra Iouin. c.
16. & c. 24
& alij.

Mitto ea prosequi, quæ si etiam concedantur, nihil detrahunt cœlibatus honori. Obijcit enim, & acriter in eos inuehitur, qui cœlibatum violant. At quid quæso, officit sancto instituto prauorum transgressio, ac præuaricatio? Lex enim ipsa sancta semper, & bona censeretur, nec ullo modo propter præuaricantes uituperari debet: Alioqui & euangelica lex, & baptismi sacramentum, & ipsum etiam matrimonium tanto opere tibi à Cosmophilo commendatum, pari ratione improbari possent: quandoquidem non desint ipsorum præuaricatores. Et quæ nam lex sancta haberi poterit, & iusta, si requiratur ut citra ullam transgressionem ab omnibus prorsus impleatur? quamquam multa hyperbole in nos insultat. Nam, ut minimè contumeliosus, ac maximè uerecundus, addit.

Atq; utinā uerè castrati sint, quicunq; suis uitijs magnificū castrationis prætexunt titulū, sub umbra castitatis turpius libidinantes. Neq; enim mei pudoris esse puto cōmemorare, in quæ dedecora sæpè prolabantur, qui naturæ repugnant. Audis hominē uerè sui pudoris oblitū, & perpetuū blasphemū, qui uiros etiam sanctissimos, naturæ repugnare coarguit, quodd postpositis carnalibus copulis, angelicū uitæ cœlibis statū, spiritu sancto suafore amplexi sūt, & seruauerūt, quasi uerò nullus coniugatorū in dedecora sæpè

prolabatur. Verum iterum audiamus illū errata erratis cumulātē etiā amplius. Postremò, inquit.

Ne præcipit quidem Christus ulli cœlibatum: at idem diuortium palàm interdicit.

Falsum illud primum, nemini Christum interna inspiratione præcipere cœlibatum.

Greg.

Quorundam enim (B. Gregorio gravissimo teste) tales sunt Dei uocationes, ut nisi pareant, & cœlibatus statum assumant, salui esse non possint. Sed si donemus istud esse verum, nemini scilicet Christum cœlibatum præcipere: An nō hoc vel maximè pro dignitate cœlibatus facit? Siquidem, cum res sit ardua, & propemodum diuina, & ita non omnium: idcirco sapientissimus Magister, & Dominus noster illatū cōsult; non præcipit, sciens paucos eam vitam, si cum infinita cæterorum hominum multitudine conferantur, amplexuros. Quod verò adiunxit: At idem diuortium interdicit coniugibus, suo se cultro iugulat. Qui enim carnis interdicit diuortium, non minus interdicit longè dignius matrimonij spiritualis, hoc est, ipsius cœlibatus solutionem. Et si adulterij reatum, præuaricator matrimonij incurreret, certè sacrilegij crimen violator cœlibatus non evaderet. Nunc audiamus, quid adijciat vir, ut ita dixerim, ad excitandam in Ecclesia Dei seditionem, & scandala natus.

Mihi sanè videtur, inquit, non pessimè consulturus rebus, ac moribus hominum, qui sacerdotibus quoq; , ac monachis, si res ita ferat, ius indulgeat coniugij: præsertim cum ubiq; tam ingens sit sacerdotum turba, quorū quotusquisq; castam agit vitam? quanto satius concubinas in vxores vertere, vt quas hunc habent cū infamia, cum irrequieta conscientia, habeant palàm cum honesta fama, ac liberos gignant, quos vt verè legitimòs ament, sanctèq; instituant, quibus & ipsi pudendi non sint, & vicissim ab illis cohonestentur. Hæc de Cosmophili sapientia.

Mihi, inquit videtur non pessimè cōsulturus. Non dixit, optimè consulturus, aut bene cōsulturus: sed, non pessimè. Malum enim esse cōsiliū, si verba pōderes ipse fatetur; & uerè malum, ut tacitè concedit: imo & pessimum, tametsi hoc neget. Nonne pessimum uerè esset, & indignissimū cōsiliū, per quod insignis decor, & pulchritudo castissimæ Ecclesiæ Christi sponsæ obliteraretur? Quem enim nobis ab Apostolorum tēporibus, potest Cosmophilus uirum in Ecclesia celebrem in exemplum proferre, qui simul liberis procreandis operam dederit, & sacris literis cū laude, & animarum salute uacauerit? Quotquot enim cum græci, tum latini pastores, in Ecclesia Dei admirabili uitæ sanctitate claruerunt, & sacras scripturas egre-

gijs commentarijs illustrauerunt, omnes citra ullam dubitationem in cœlibatu constantissimè uixerunt, & ad eandem uitæ puritatem uerbis, & scriptis posteros seridè cohortati sunt. Monachis uerò nuptias concedendas consulere, quid aliud est, quàm uitam monasticam radicitus extirpare? At istud est, istud inquam, quod malignus desertor & impurus: Spiritus Satan per suum discipulum Cosmophilum obtinere moliebatur; qui optimè nouit, sublato de Ecclesia cœlibatu, statum Ecclesiæ catholicæ integrū diu stare non posse. Nam quòd concubinas in uxores uertendas consulit, pessimum omnino consilium: saluberrimum uerò, ad sacerdotium non debere elegi nisi uiros idoneos, & probatos, iuxta sanctissimos canones, & improbos iustis pœnis coercere, & ita suam retinere in clero morum grauitatem, & sanctimoniam: nō autem carni, & libidini alienam à cultu Dei permittere licentiam.

Extr. de præben. c. graue nimis.

De vit & honest. cler. c. ut clericorū.

Quoniam uerò quidam de summis Pontificibus fertur dixisse: Sacerdotibus magna ratione sublatas nuptias, maiori restituendas uideri. Id hæretici impudici usq; ad sydera in auctoritatem efferunt, cogitare nolentes, quòd ille ut homo, tum antequam esset creatus Pontifex à prudentia sæculi huius instructus, quasdam iactabat eiusmodi sententias: & tamen uide, quàm non

minus timidè, quàm cautè. Nihil enim asserit, sed uideri inquit: fortè de uulgi tunc opinione sensit, aut mundi sapientum. Huic uni sententiæ mordicus adhærescunt hostes fidei: Si qua uerò seria decreta, & doctrinam catholicā cum in fide, tum in moribus tradiderit, nedum ipsi dissimulant, sed impiè repudiant. Quodd si etiam unam hanc fortè inter prandendum & summus Pontifex existens, citra ullam determinationem protulerit sententiam: quot obsecro aliæ, & quanto grauiores extant aliorum summorum Pontificum sanctiones, & grauissimorū doctorum sententiæ, qui secus omnino docent, & cœlibatum in personis Deo sacratis statuunt, & uiolatores tanquam sacrilegos, & perfidos damnant? Quamobrem, quo sit præditus spiritu, imo quanta carnis impuritate inquinatus qui contra dicit, uel hinc faciliè patere potest, quod hæc est manifestè communis uox, & uetus querela hæreticorum: sed non præualebit. Quid enim est (ut modo diximus) concedere in Ecclesia monachis coniugium, nisi statum ipsum perfectioris iustitiæ ab ipso Christo constitutū, atq; sacratum, de ipsa Ecclesia tollere? Dare uerò hanc indulgentiam sacerdotibus, quid est aliud quàm altaria profanare, & ipsius Christi hostiam puram, atq; immaculatam cōtaminare, & (quod merè sacrilegium est) legitimè fieri

Lucij pri Sy-
ricij. Inno-
centij pri.
Zacchariæ.
Cōciliorum
Elibert. cap.
33. Aure-
lian. 3. c. j

posse, dogmatizate: Nam, quod nunc per concubinas scdatur, illicite fieri nemo nescit. At si illud lege concederetur, iam licite fieri censeretur, quod est horrendum.

Sed clamant. Quotusquisq; est de tanta sacerdotum turba, qui castam agant uitam? Ego quidem esse multos non dubito; sed hominum nequitia in eos potius oculos conijcit, qui labascunt, quàm in illos, qui suum statum, & pudicitiam sanctè custodiunt. Ideo ex paucis illis notis, qui labascunt, ceteros tales esse, inuvalida coniectura pronuntiare, iudicij est temerarij, & damnabilis. Verùm, si abundare prauaricationem concederemus; nunquid propterea decor Ecclesiæ est abolendus, quia multi, quod promittunt, non seruant? Sed quis est, qui baptismum custodiat illibatum, & nullam post contrahat etiam lætiferam in uita sua maculam? Ergo ea ratione tolli deberet & baptismus, & cetera sanctorum morum præcepta; & leges deniq; omnes. Sed hæc missa faciamus, ne margaritæ conculcentur à porcis. Neq; enim omnes spiritum Dei habent, ut probent sanctiora, & magis pudica. Audiamus & quæ sequuntur. Ipse enim tanquam in seipsum arguens, in hunc modum loquitur.

Sed diuina quædam res est uirginitas, ac humana quædam res est coniugiū. Deinde respondens ait:

dens ait : Ego nunc homo loquor hominì.

O argutum responsum, quod vel perfidi est, & se christianum esse negantis, vel causam itolide prodentis. Non enim reuera aliud est fateri, se vt hominē loqui hominì, nisi se loqui vt mendacem, atq; insipientem, sicut ait Scriptura : Omnis homo mendax. & Dominus Petro : Va- Psal. 115. a.
 de post me Satana : Non enim sapias, quæ Dei Matt. 16. d.
 sunt, sed quæ hominum. Sed ille verè perfidus, id potius suadebat, tanquam si expressius diceret : Mitte diuina inquirere Dijs, Tu cum sis homo, & mortalis, quæ sunt hominum ; & quæ sunt mortalia cura. Nam hæc certa sunt, illa quis nouit ? quis reuersus est de cœlo, aut ab inferis. & renuntiavit nobis ? Sap. 2. a.

Tu verò, Aporetice, caue tibi omnino; memento approbata ab Apostolo illius sententiæ. Corruptunt bonos mores colloquia mala. 1 Cor. 15. d.
 Quare & quod sequitur, letale virus habet.

Tum, inquit, si in cæteris maximè laudē mereatur virginitas, in te certè reprehensione carere non potest, per quem stabit quominus optimum illud genus, & immortalitate cum primis dignum oblitteretur.

Quasi verò in te vno situm sit humanæ propagationis seminariū, vel illius exitiū. Gere morē Cosmophilo, vxorem ducas, nūpriarū opus impleas : At quis te certū reddit prolem inde pro-

Gen. 30. a.
&c.
Isai. 66. c

Gen. 19. g

Plin. Hist.
nat. lib. 8.
cap. 42.

creaturū? Nonne à Domino est fructus ventris? An nō sentis tibi nō immortalitatis præmiū, sed mortis injici laqueum? Nec veritus est homo obscænus cōmemorare filias Lot, quæ vt genus paternum seruarēt, cum ipso patre misceri astu, inquit, mirifico procurarūt. Quid ergo tam improbandum superest, quod iste ad suam causam quouis modo conducens non afferat? Quis Theologus incestum illum, & illum fœminarum ausum non vituperauit, velut à stultissimis mulieribus intentatum? Verè multa dixit Cosmophilus vt homo, & quæ humana sunt cogitauit, illa tibi obijciens, quibus te astu alliceret. At hoc in loco, quæ vel ipsæ bestię exhorrent, & ipsa Venus non probat, proponere tibi in exemplum non exhorruit. Est apud Ethnicum philosophum in libro de animalibus, equum quendam se dedisse præcipitem, vt nouit per libidinem sibi matrem fuisse suppositam: Et nunc Cosmophilus exempla eiusmodi tibi illo prætextu excusans proponit, ne scilicet mundus tua sterilitate perdat. Putat igitur tuum genus, si maritus fias, continuo immortale futurum, tanquā si certò sciret, te, vt dixi, habiturum vtriusq; sexus liberos, qui item alios generent, & item illi alios: nihil de sterilitate, de cladibus, de morbis, & innumeris alijs casibus; imo nec de Deo ipso omnium donorum largitore cogitās.

An non in dies familias plusculas funditus interire videmus? Quæ autem potest inde suboriri Christiano iactura, cum omnes fratres simus, & finis carnalis propagationis propemodum consummatus sit? Sed donemus istam tibi immortalitatem: quid est hoc tandem vsq; adedò exitium, ad quod optandum tantopere te extimulat, & impellit? Nempè generare hominem, quem Deo generes. At si Deo non generaueris, sed potius Lucifero, ac gehennæ, vt sæpius contingit, nonne pænitentia te generasse vrgeberis. Nam & Dominum Deum propter hominū malitiam dicitur pænituisset quòd fecisset hominē. Quid scis ergo tu vtrum potius generes filium gehennæ, & hoc præsertim tempore, quando creuit nequitia, & malitia in orbe vniuerso? Quanto itaq; melius est, meliori vocationi consentiendo, tutiorem tibi vitam eligere, ac tuæ saluti consulere, quò possis & tuo exemplo, & monitis, quæ plurimum valent, quibus etiam vita ipsa consonet, plurimos ad pietatem, & Dei cultum multò sanctiorem attrahere; quod est uerè, ac tutò generare Deo, idq; ad beatam ac sempiternam uitam?

Gen 6. b.

Illà porrò, quæ ab initio tibi ponebat ante oculos, & sub finem epistolæ, aut potius orationis suæ recenser: nimirum puellam tui amantissimam, summo genere natam, ætate floridam,

facie spectabilem, moribus insignem, summa cū dote tibi offerri, magna profectò, & titillatrix illecebra est. Sed quanto hæc fallax, & fugax illecebra maior, tanto tu holocaustum pinguius reddes Domino Deo tuo, si his reiectis totum te illi consecres. Nos præcepto non te astringimus: sed si uocationem Dei sentis, eam omnino ne spernas, consulimus: imo non nos, sed Christus ipsa æterna ueritas, qui dixit. Omnis, qui reliquerit patrem, & matrem, & filios, & uxorem, & cætera, centuplum pro uno accipiet in hoc sæculo, & in alio uitam æternam. In hoc sæculo, inquit: Verum id Cosmophilus non credit: sed illi certò norunt, qui sunt experti, & qui ponentes manum ad aratrum, non conuersi sunt retro, nec sicut Cosmophilus apostatarunt. Ut autem laudes sanctæ uirginitatis obscuret, semper in deterius labitur.

Neq; uero, inquit, me clām est, magnis uoluminibus priscorum Patrum decantatas uirginitatis laudes, quorum Hieronymus adeò miratur eam, ut non multum absit, à contumelia matrimonij, & ab Episcopis orthodoxis ad palinodiam sit inuitatus.

Quid hic aliud respōsi meretur insignis susurro, qui adeò meras calumnias in sanctum uirum loqui nō ueretur, quas & alibi in suis libris sparsit? Cur homo mendax, & impostor nō aliquem

unum ex illis episcopis, & orthodoxis espresit?
 Quasi verò vllus celebrium doctorum ea ætate
 claruerit, qui summis laudibus virginitatē, & pec-
 culiari libello & sermone in cœlū nō extulerit.

Basil. Aug.
 Ambr. &
 Chrysost. &
 alij.

Et quod subdit: Verū donetur hic ardor illis
 tēporibus, eundem qui supra, errorem cōtinet.
 Putat enim, aut potius se nescire simulat, priora
 tempora magis requisisse cœlibatum, quàm no-
 stra, contrā expressum ipsius Christi verbum, vt
 diximus, & clarissimam Apostoli Pauli senten-
 tiam; sed & contrā rationem manifestam. Sicut
 enim operæ carnis, & voluptati vacare, longē
 minus decet senem, quàm anterioris ætatis ho-
 minem: ita de mundo in hac eius senectute æsti-
 mandum est, quod explicitè Apostolus docuit,
 & omnes sancti doctores, & Cosmophilus legit,
 sed non verè percepit.

1. Cor. 7.

Excogitauit & pro coniugio alias nouas ra-
 tiones. Primò ex dictis Theologorum. Sup-
 ponit enim bonum esse pugnare cum Turcis.
 At si substuleris, inquit, coniugium, etiam pu-
 gnatores vnà sublati erunt.

Quid hic dicam? nisi hunc hominē ita loqui,
 ac si te cœlibatū proficiente, periculum immineat
 Christianitati à Turcis, vt sic militiam in tua po-
 steritate constituat. Nec illud cogitauit Cosmo-
 philus, quòd in Turcas nō tam numerositas bel-
 latorū valet, quàm oratio Ecclesiæ, & præsens

animus spiritualium militum, ac fortitudo, & fiducia ex Deo. Huiusmodi armis præcipuè superarunt nostri, cum superarunt.

Addit calumniator, docere Theologos, licere trucidare ferro parètes infideles, ut eorum liberos liceat baptizare, & propagare Deo. At hoc, inquit, mitius erat efficere coniugiorum officio. Verùm non ea erat usq; adeo atrox doctrina, quam ponit Theologorum, quam neq; Ecclesia Dei recepit unquam, nec in praxim adduxit. Quòd si fortè uni, aut alteri ex theologis ita uisum est, longè ponderosior erat reliquorum opposita sententia, cui & consuetudo, optima legum interpret, astipulabatur.

Genes. 38. b

Pergit etiam argumentari, puniri legibus, si quis procurat abortum, aut accersiat pharmacis sterilitatem; & in sacris literis mortis supplicium esse illatum ei, qui potius elegit semen de industria effundere, quàm fratri defuncto liberos suscitare. At parum differt, inquit, si quod nasci ex te poterat, sterili cœlibatu prohibeas, ab hoc, quod in tuo corpore vel arefcit, uel magno etiã salutis periculo corrumpitur: quod in somnis elabitur, homo erat, si modo tu esses homo.

At si hæc obscœna argumentatio quicquàm ualet, omnes prorsus homines constituit homicidas, etiam maritos, quibus semen sæpè excidit frustra. Non enim semper tenentur aut maritis

uxores adesse, aut uxoribus maritos. Sicut autem sunt causæ iustissimæ, ob quas præstat ab uxoribus ad tempus, potissimum ut uacent orationi iuxta doctrinam Apostoli, segregari, ut nullum sit piaculum, si semen frustra emittitur: ita una causa est maxima, qua liceat, & honestum sit nunquam sociari coniugio, uidelicet, ut liberior uacemus Deo, ut ita fiat maximopere lucrosus, futurum illud naturalis fluxus dispendium. Neque enim maritus totiens facit conceptus, quotiens semen in uxoriâ terram iacit: quin etiam in non paucis accidere experientia uidemus, nullum inde nasci fructum. Fructus enim uentris potissimum ab ipso naturæ parente tribuitur. Quodd uero periculum magnum salutis ijs ex Galeno ponat, qui semen continet, ut eius consilio præstet effundi, Cosmophili carnalis cautio est, nescientis alia in lege noua esse parata contra eiusmodi fluxus remedia, longèque plus posse Christum quàm Galenum. Quamquam ex Galeno ipso possemus obijcere, longè plures perijsse ex nimio cum uxoribus congressu, quàm à semine non effuso. Nam & Hypocratices diuina uir sciëntia (sic enim refert Gellius) de coitu uenereo ita existimabat, partem esse quandam morbi teterrimi, quem nostri comitiam nominarunt. Multum uerò interest, utrum quis de industria prouocet à se semen, ne emittatur,

1. Cor. 7.

Genes. 30. a.
&c.
Isai. 66. c.

Gal 6 de locis
affect. c. 5.

Gal. lib. pri.
de semine,
cap. 16.

Aul. Gel.
lib. 19. cap. 5.

& legi repugnet, quæ iubebat coniugium: an uerò, ut rem superflua natura foras emittat. Hoc enim nulla unquam lege animaduersum fuisse Cosmophilus legit: ac proinde non eousque stolidos arbitror reperiri populos, qui eius auctoritate permoti legem ferre super hoc consentiant.

At, inquit: Si quis agrum sterilem relinquat, non ibi serens aliquid, aut plantans, quod metat, aut fructus colligat, nonne uituperatur, & supplicio dignus censetur, tametsi ea res non fiat absq; labore, & sumptu? Quid ergo meretur, qui etiam cum uoluptate, & magna spe frugis, potest hoc facere, & negligit? Qualis est homo, qui nuptijs cœlibatũ præponit?

Tu uerò, Aporetice, ne ab exemplo decipiari, cogita cœlibem non habere agrum, quæ colat, ut illi si non coluerit, ualeat imputari. Quis enim eum uituperet, qui non colat agrum, quem non possideat? Diceret quis; Posset habere, si uellet: sed quæ lex in illum animaduerrat, qui potens parare sibi agrum, optima ratione maluit non parare, ut suas meliores operas in melioribus etiam officijs collocaret? Ac ista quidem argumenta ad idem semper recidunt, & infidelitatem sapiunt, imo in Christum blasphemiam, qui tam clarè consulit, ne dum terrenum agrum, sed fratres, sorores, matrem, & patrem

patrem, imo ipsam vxorem, imo animam propriam relinquendam esse, ob adipiscendam vitæ purioris prærogatiuam? Hæc est non immerito illa margarita, cuius amore negociator ille euāgelicus vendidit omnia, quæ habebat, vt emeret illam. Etenim si sermo iustius profani consultoris audiendus esset, non optimam partem elegeret Maria, sic a Domino commendata, sed deteriore; quod sacrilegum est vel persentire. Sed hæc sanctioris vitæ documenta, atq; exercitia ignorabat Cosmophilus, tametsi ea monstraret Apostolus, imo ipse Dominus noster, ac redemptor Christus, vt iam superius ostendimus.

Matt. 13. f.

Luc. 10. g.

Post hæc, ut te iuuenem iuuenilibus illecebris alliciat, quæ sunt dulcia in vsu coniugij longa oratione commemorat, in quibus insistere nihil prodest. Nihil enim nisi, quod est prudentiæ, seu potius impudentiæ carnis adducit, ita vt dicat miser, & carnalis doctor, absq; illa opera coniugali, & lasciua, ne viri quidem vocabulum quemquàm mereri.

Sed alia est sapientia spiritus, d, Aporétique. Non enim ab re sacræ literæ Ethiopem illum Eunuchum Candaces reginæ virum vocat: quoniam scilicet in eo, vt sacri doctores animaduertunt, eleganter illi designabantur, qui reuera sunt viri. Illi enim verè sunt viri, non autem es-

Actu. Apostol. 8. e.

Nicol. de Iyr & alij.

fæminati, & mulierosi qui ab omni muliebri voluptate se per Dei gratiam abstinēt, & impetum superāt naturæ: Calumniosum verò illud omnino est, quod in cœlibes obiecit, quasi sint humani generis offores. Nam ij potissimum sunt, qui diligunt homines, & expeditius charitatis officijs iuuant.

— Pudet, quæ de poetis, & fabulis iterū affert, recitare; vt illud Virgilianæ Iunonis. Et pulchra faciat te prole parentem. & illud Didonis. Vbi quis tibi paruulus aula luserit Aeneas. & quod Flaccus. Felices ter, & amplius, quos irrupta tenet copula: & alia huiusmodi ethnicorū hominum & infidelium dicta, indigna, quæ à viro christiano ad rem seriam adducantur; præsertim quod nihil ad causam faciunt, nisi vt probetur matrimonium, & fructus eius, & eos, qui illo legitimè vtuntur comprobemus, quod & libenter facimus: at non cum iniuria, & depressione cœlibatus.

Attulit postremò pleraq; matrimonij comoda Cosmophilus, suam his locis latè spatiatum eloquentiam ostentare studens: at incommoda longè plura, eaq; grauiora, ut uersutus rhetor cautè subticuit; solum si qua essent, à uitijs hominum euenire, non à coniugio insinuat.

At uerò aliter nos Euangelium Christi docet. Non enim de uitijs hominum, ac natura; sed de

Virgil.
Æniad. i.
Idē æniad. 4
Horat. Car-
m. i. ode 13.

ipsius matrimonij conditione considerabant, qui dixerunt: Domine, si ita habet causa hominis cū uxore, non expedit nubere. Vbi Dominus fauens dicto, & hominum insipientiam indicans respondit, Non omnes capiunt uerbum istud, sed quibus est datum. Matt. 19. h.

Tū uerò, Aporetice, ut faciliè capias, quantū cœlibatus ad felicitatem præcellat, ac præstet coniugio, illud tibi præstitue, uerum bonum hominis esse adhærere non patri, non matri, non uxori, non cuiquam rei creatæ, sed ipsi Deo. Vnde psalmus: Mihi autem adhærere Deo bonum est. Non dixit; Mihi adhærere uxori bonum est, sed Deo. Voluit quidem Deus hominem adhærere uxori suæ secundum carnem, sed imprimis sibi secundum spiritum. Huic autem adhæsiōni multum officit matrimonium, ob innumeras quas secum affert, impediētes causas. Huius rei gratia dixit Apostolus: Bonum est homini mulierem non tangere. & amplius: De uirginibus præceptum Domini non habeo, consiliū autem do: quoniam bonum est homini sic esse. Dixit; bonum est homini uniuersaliter, nō dixit; sacerdoti, aut episcopo, aut apostolico uiro, ut Cosmophilus fallaciter interpretatur; sed absolutè: Bonum est homini. Nec dixit: Bonum est hoc tempore, sed absolutè: Bonum est. Et ne temporum differentiam cogitaret Cosmo-

Ibidem.

Psalm. 72. d.

Genes. 2. d.

1. Cor. 7. a.

Ibidem.

Ibidem

philus, cur id esset bonum, declarans, dixit. Qui sine uxore est, sollicitus est quæ Domini sunt, quomodo placeat Deo: qui autem cum uxore est, sollicitus est quæ sunt mundi, quomodo placeat uxori, & diuisus est, hoc est, distractus partim Dei, partim mundi.

Audin tu Apostolum, Aporetice? Profectò si illum audis, Cosmophilum non audies, qui & secunda, & tertia, & quarta nuptiarum repetita uota collaudat, quæ tamen etiã ipsi ethnici probro dabant. Etenim illum Mauritium, nescio quem, uirum tibi notum effert in auctoritatem, & exemplum, qui post defunctam primã uxorem, mirificè, ut ait, à se adamatam, mense altero nouam nuptam in suum thalamum introduxit. Quod, si uerum est, certè probauit homo ille, se non tam uxoris amantem, quàm probrosæ libidinis. Quamobrem eius exemplo nullus, nisi parum civilis, & pudicus moueri debet, quasi ex eo factò laudem ullam mereatur. Illud potius commendari oportuit, si uates sunt adducèdi, quod expressit sua Vergiliana Dido. Ille meos primus, qui me sibi iunxit amores; Abstulit, ille habeat secum, seruetq; sepulchro. Nec defunt innumeri, qui post primas à secūdis nuptijs magna cum laude abstinuere. Sed quia non satis erat Cosmophilo, hoc uno exemplo tibi suadere, adiunxit aliud penitus impudicum;

Virgil.
A. Enia 1. 4

nempè de quodam Iouio, qui tunc etiam quartas nuptias ambiebat. Verùm, quàm laudabilis sit digamia, vel illud Apostoli præceptum ostendit, quo digamos sacerdotio ineptos censuit. Neq; enim videtur facilè posse hominè in virum spiritualem transire, quem post primas nuptias non cæperit illius maritalis copulæ satietas.

1. Tim. 3. 9.

Post verò multa, quæ ad laudem illius carnalis copulæ induxit, metuens, ne per cœlibatum tandem genus hominum intereat, magnà indignatione turgens, ait.

Eamus nunc, & miremur cœlibatum, qui æternam sit generi nostro cladem allaturus: circumuolat vndiq; mors, ruit, rapit, properat quantum potest genus nostrum extinguere, & nos cœlibatum miramur, coniugium fugimus: nisi fortè placet Essenorum institutum, aut Dulopolitarum, quorum genere facinorosorum nunquam deficiens numerositas propagat. Hæc Cosmophilus, plenus timore, ne mundus propter cœlibes quàm ocysimè pereat.

Ego verò miror, eum hoc in loco non clamitasse, O, populares accurrite, succurrite, & cæteras prophanas eiulationes, & suspiria, quæ in comœdijs, aut tragœdijs ipse vociferata legerat. Sed, o, Cosmophile, audi parumper, hoc te metu & anxietate facilè liberamus. Desine

Gen. 6. b.

Ibid. 7. d.

Luc. 17. f.

omnino metuere: non peribit cœlibatus vitio mundus, sed potius quia spreto cœlibatu nimis facundus mundanos homines, & dignos exitio perferet; ideo peribit mundus. Quemadmodum enim tempore Noe, ut iam superius ostensum est, quoniam omnis caro corruerat viam suam, omnis caro est deleta diluvio: ita sub mûdi finem, ut Dominus prædixit; quia erunt homines edentes, & bibentes, & nuptui vacantes, igne ultore destruetur mundus.

Matt. 19. b.

Dicit quis fortè pro Cosmophilo. Quid si omnes cœlibes fiant? Respondi iam, & iterum nunc respondeo. Quiesce. Istud quippe non euenturum Dominus ipse testatus est. Non omnes, inquit, capiunt verbum istud. An post datum à Domino consilium, ab innumeris receptum, & observatum, animaduertit vllus mundo propterea suam hominum multitudinem defuisse? Nonne stetit mundus cum cœlibatu iam per tot sæcula? Quid metuis nunc, ne deficiat? An putas Deum ob consultum cœlibatum, connubijs suum fœtum subtraxisse, & hominum propagationem velle extinguere? Ergo sile domino Deo tuo, nec finituri tandem mundi causæ patrocinare, qui habet authorem, cui est curæ, Cosmophile, absq; te.

Quòd verò nos in gregem Essenorum, & Dulopolitarum non verearis projicere, damus hoc

& procacitati tuæ, & impietati; qui quod est verè euangelicum, & christianum, tribuis stultitiæ hominum: sicut & in tua Moria olim fecisti, in spiritum ipsum Dei peccans, reus factus æterni delicti. Sed ut tuo te gladio iugulemus, dic nobis, quæso, in quonam grege te ipsum constituis? certè non maritorum, cū nolueris vnquam esse maritus: non cœlibum, & ut vis, Essenorum, quos tantopere vituperas. In quo ergo collocaris cœtu? si fortè mundo fructus generationis aliquos reddidisti, certè uel adulterorum, vel stupratorum, uel quouis modo fornicatorum uixisti socius. Audin tu, Aporetice? & hic tamen est hodie mundi doctor, & censor, & tibi sanctissimi cœlibatus dissuasor.

Sed ut aliquando sermoni finem imponam, quia modum epistolarem iam nimis excedit, in pauca totam causam iam contraham. Prouidendum enim est, ne huc rem tandem doleamus tendisse, ut qui iam ferè constitueras cœlibem agere uitam, nunc in deliberatione propter eos nutes, qui hoc uitæ genus uituperantes, ea tibi ante oculos proponunt, quæ primo aspectu carni iucundiora, & gratiora uidentur, quæ Cosmophilus longo enarrauit sermone. Tuum uerò est, si sapis, neq; quod Cosmophilus de proprio sensu effutiuerit, neq; quid ego contra disseruerim probare temerè, & absq; trutina & certo

Ioa. 14 a

examine, sed cui ipsa ueritas magis assisat, & apostolica tuba foris, & intus insonet, attentè, ac diligenter considerare. Veritas proculdubio Christus est. Ego, inquit ille, sum via ueritas, & uita. Attende ergo ad illum, & quid tibi suadeat cum factò, tum uerbo animaduerte. Etenim cum posset ipse ut homo, & matrimonio copulari, & cœlibem uitam agere, quid elegit? res ipsa clamat: nam primum elegisse, indecentiam primo auditu sonat angelis, & hominibus christianis intolerabilem.

At hic nobis obstrepat Cosmophilus, ut quod est clarum, satis obturbet. Plurima, inquit, sunt in Christo, quæ mirari potius, quàm imitari debemus. Quid in eo non supra naturam? Sint hæc illi propria: nos intra naturæ legem uiuentes, suspiciamus illa quæ supra naturam sunt, & quæ pro modulo nostro sunt, æmulemur.

Gratias hîc primùm ago Cosmophilo, quòd hic immemor sui, cœlibatum non pugnare cum natura inquit, sicut iam ipse secum pugnans superius nobis obijciebat: sed esse quiddam dignius, atq; excelcius, & utpote supra naturam admirandum, atq; suspiciendum. Iterum gratias illi agimus, quòd uel coactus, & inuitus constetetur connubium à cœlibatu dignitate atq; honore præcelli. Hoc tantum ait, non æmulandum. Id uerò quid ita? num propter sui excellentiam?

lenciam? At Paulus ait. AEmulamini charismata meliora. An quia donum illud assequi non possumus, sed sit Christi proprium? Hoc ille uelle uidetur. At si ita est, quomodo donum illud assecuti essent plurimi, & assequuntur? & quomodo ad hoc ipsum, si à nobis impleri non posset, inuitaremur a Domino? Sunt eunuchi, inquit, qui se castrauerunt propter regnum Dei, ut superius attulimus. Quis hoc in loco non miretur perpetuam hominis impietatem? unum Christum in exemplum ponit, cuius sunt facta admiranda, non imitanda: ut illi soli prerogatiua cœlibatus sit reseruanda; non autem ab ullo alio amplectenda. At cur ipsemet uitam cœlibem alijs consuluit, si à nemine potest obseruari? Ecce si enim plurima sint Christo soli propria, aquam in uinum mutare, panes multiplicare, super undas ambulare, cœcos illuminare, & deniq; mortuos suscitare, & reliqua diuina opera facere: tamen in his, quæ ad uirtutum imitationem spectant, illud possumus cum eius auxilio, & debemus imitari: Discite a me, ait, quia mitis sum, & humilis corde. & Exemplum dedi vobis, ut quemadmodum ego feci, ita & vos faciatis, & cœtera huiusmodi documenta. Nonne illum imitabatur Apostolus? imo nonne sancti & beati adhuc in terris uiuentes? Nonne etiam in hoc eminenti cœlibatus statu, sũt illum.

1. Cor. 12. d.

Matt. 19. b.

Ioa. 2. a.
Matt. 14. b.
Matt. 14. c.
Ioan. 9. a.
Ioa. 11. c.

Matt. 11. d.
Ioa. 13. b.

imirati Beatissima illius mater, & Virgo, Ioan-
 nes Baptista, Euangelista, Apostoli, Euangeli-
 sta, Sancti, & Sanctæ innumerabiles, quorum
 quarunquē gloriosas festiuitates celebrat San-
 cta mater Ecclesia catholica? At hic noster
 rhetorculus perinde loquitur, ac si nunquam de
 historijs sanctorum quicquā aut legisset, vel
 audisset. Certè Breuiarium diuini officij, ve
 vocant, illum idoneè instruere potuisset, si illud
 recitauit vnquā perfidus apostata: nisi velit
 ipsius quoquē vniuersalis, & catholicæ Ecclesiæ
 fidem, cultum, cæremonias, & priscas ab initio
 nascentis Ecclesiæ traditiones repudiare. Et
 Apostolus similiter ait. De virginibus consi-
 lium do, tanquam misericordiam consecutus
 Domino, ut sim fidelis. Existimo enim hoc
 bonum esse propter instantem necessitatem:
 quoniam bonum est homini sic esse. Solutus es
 ab uxore, noli querere uxorem. Si autem ac-
 ceperis uxorem, non peccasti: & si nupseris
 uirgo, non peccauit: tribulationem tamen car-
 nis habebunt huiusmodi. Ego autem uobis
 parco. Hæc Apostolus, imo per ipsum ipse
 Christus. Aiebat enim. An experimentum
 queritis eius, qui in me loquitur Christus? Hæc
 salutaria documenta contra virus lætale, sæ-
 pius repetenda duxi quo tibi penitus in corde
 figantur. Quid hic enim contra Cosmophilus?

1. Cor. 7. d.

2. Cor. 13. a.

Num potest mutire? Num ualet hoc in loco hiscere? Non opinor, etiam si maximè procax sit, cum simul & se christianum profiteatur. Nec habet, quod opponat, nisi generis somniamam immortalitatem, carneam puellæ pulchritudinem; quæ si cum pulchritudine mentis, & immortalis uirtutis conferatur, turpitudine, & marcedo quædam uideri possit.

Sed morata est: Quid illi deperit de suis moribus, si eam non duxeris? An non tibi potius deperibit de tuis, si duxeris: quia florem tuæ uirginitatis, & castitatis exstingues, quæ nullo humano bono compensari potest?

At cum summa dote tibi offertur. Sed quæ dos ullâ maior, quàm illud uirginitatis immortale præmium, quàm nostri aureolam uocant: cui si montes auri compares, ueluti stercora reputabuntur?

At hanc copulam desiderant affines, propinqui, amici, ciues, deniq; Cosmophilus tuus, ut fingit, amantissimus obsequiosissimus, fidelissimus: sed re uera hostis insidiosissimus, & perniciosissimus. O, si stylum ad suadendum melioris partis statum suscipiendum conuertere uoluisset, quanta uerè tibi & saluberrimo consilio enumerare ualuisset, uxoris seruitutis incommoda, quibus recensendis integrum uolumen uix sufficeret. Sed quia te in decipulam per-

Thom. 4.
sent. dist. 49.
art. 3.
Petrus de
Pal. & alij.

trahere moliebatur, subdolè omnià reticuit.

Matt. 10. d

Ego autem imo non ego, Apôtetice, sed Christus redemptor, & Dominus tuus, quod iam ex illo adduxi sedulo tibi prædicat, & clamat in aurem. Inimici hominis domestici eius: qui si vehementer copulam istam carnis suadeant, nō sunt præponendi uerioribus tuis amicis, sanctis Angelis & Dei seruis electis, & ipsi Christo, qui sunt tibi & pater, & mater, & fratres. Hi autem secus optant, tibiq; tantò maiore, ac fortiore necessitudine coniunguntur, quanto fortius est spiritus uinculum, quàm carnis: ij tibi prædicunt, & fidelissimo uerbo contestantur; operam, quam dabis uxori, si forsitan matrimonij nexu alligaberis, illam subtrahes Deo. Studebis enim coniux magna ex parte ijs, quæ uxori placeant, & eris non iam unus, sed duo: ut Martha Martha, quæ sollicita erat, & turbabatur circa plurima. Sin autem coelibem uitam delegeris, ijs totus incumbes, quæ placeant Deo, & uerbum Domini illud, magno uocum gaudio tunc intelliges: quia illud in te ipso experiens impleri senties, & à pijs, qui tibi gratulabuntur, tibi meritò applicari. Vnum est necessarium: Aporeticus meliorem partem elegit, quæ non auferetur ab eo. Hic finem sermoni facio, hic quiesco; solum admonéo, ut epistolas, & quæcunq; scripta istius perditu ho-

Luc. 10. g.

minis Cosmophili in posterum tãquam pestem
terrissimam subterfugas. Recurras verò ad
nostrorum sanctissimorum heroum lectionem
purissimam Ambrosij, Augustini, Hieronymi,
Chrysostomi, & cæterorum, qui te & de cœli-
batu ipso proprijs opusculis, & de verâ, & sem-
piterna salute fideliter instruant, vt minime di-
uisus possis amabili libertate tuo Creatori cum
puritate mentis, & corporis militare: & tandem
illustri cum triumpho ad coronam gloriæ cœ-
lestis feliciter peruenire. Et Dominus ipse
Christus dignetur, quod tibi foris consulit, ita
intus inspirare, vt nulla per te sit mora, quomi-
nus in votum patens, ac firmum transeat, quod
iam mente conceptum erat, ac ferme delibera-
tum: ne Satan serpens diabolus per blandi-
loquum illum Cosmophilum te de-
cipiat, sed ex Aporetico mihi
πικρὸς, vel πικρὸς fias.
Vale,

F I N I S.



NONNVLLA PER LAPSUM MERRATA,

ita sunt corrigenda.

Pag. 21. versic. i. *inquies*, reponen: *inquiens*.

Pag. 38. versic. 10. *influribus*, dicen: *influxu*.

Ibid. versic. 19. *sagingentur*, legen: *saginentur*.

Pag. 49. versic. 19. *erubescant*, corrigen: *erubescant*.



